



MISA DE AGUINALDO 2024

(Tagalog)

NILALAMAN

Ordo

3

Ang Misa ng Sambayanan

7

MGA PANALANGIN AT PAGBASA

Ika-15 ng Disyembre

35

Ika-16 ng Disyembre

45

Ika-17 ng Disyembre

53

Ika-18 ng Disyembre

62

Ika-19 ng Disyembre

71

Ika-20 ng Disyembre

82

Ika-21 ng Disyembre

91

Ika-22 ng Disyembre

100

Ika-23 ng Disyembre

109

Ika-24 ng Disyembre

118

ORDO

December 15, 3rd Sunday of Advent

Evening Mass

MASS: Use the liturgy of the 3rd Sun of Adv, GL, CR, Pf II of Adv. White.

RDGS: Zep 3:14-18 / Is 12:2-3. 4. 5-6 / Phil 4:4-7 / Lk 3:10-18

December 16, Monday

Dawn Mass (Liturgy of December 16)

MASS: Comm of BVM in Adv, GL, Pf II of Adv. White. (Phil. RM p. 1268-1269)

RDGS: Is 56:1-3. 6-8 / Ps 67:2-3. 5. 7-8 / Jn 5:33-36

Evening Mass (Liturgy of December 17)

MASS: Comm of BVM in Adv, GL, Pf II of Adv. White. (Phil. RM p. 1270)

RDGS: Gn 49:2. 8-10 / Ps 72:3-4. 7-8. 17 / Mt 1:1-17

December 17, Tuesday

Dawn Mass (Liturgy of December 17)

MASS: Comm of BVM in Adv, GL, Pf II of Adv. White. (Phil. RM p. 1270)

RDGS: Gn 49:2. 8-10 / Ps 72:3-4. 7-8. 17 / Mt 1:1-17

Evening Mass (Liturgy of December 18)

MASS: Comm of BVM in Adv, GL, Pf II of Adv. White. (Phil. RM p. 1271)

RDGS: Jer 23:5-8 / Ps 72:1-2. 12-13. 18-19 / Mt 1:18-25

December 18, Wednesday

Dawn Mass (Liturgy of December 18)

MASS: Comm of BVM in Adv, GL, Pf II of Adv. White. (Phil. RM p. 1271)

RDGS: Jer 23:5-8 / Ps 72:1-2. 12-13. 18-19 / Mt 1:18-25

Evening Mass (Liturgy of December 19)

MASS: Comm of BVM in Adv, GL, Pf II of Adv. White. (Phil. RM p. 1272)

RDGS: Jgs 13: 2-7. 24-25 / Ps 71: 3-4. 5-6. 16-17 / Lk 1:5-25

December 19, Thursday

Dawn Mass (Liturgy of December 19)

MASS: Comm of BVM in Adv, GL, Pf II of Adv. White. (Phil. RM p. 1272)

RDGS: Jgs 13:2-7. 24-25 / Ps 71:3-4. 5-6. 16-17 / Lk 1:5-25

Evening Mass (Liturgy of December 20)

MASS: Comm of BVM in Adv, GL, Pf II of Adv. White. (Phil. RM p. 1273)

RDGS: Is 7:10-14 / Ps 24:1-2. 3-4. 5-6 / Lk 1:26-38

December 20, Friday

Dawn Mass (Liturgy of December 20)

MASS: Comm of BVM in Adv, GL, Pf II of Adv. White. (Phil. RM p. 1273)

RDGS: Is 7:10-14 / Ps 24:1-2. 3-4. 5-6 / Lk 1:26-38

Evening Mass (Liturgy of December 21)

MASS: Comm of BVM in Adv, GL, Pf II of Adv. White. (Phil. RM p. 1274)

RDGS: Sg 2:8-14 or Zep 3:14-18 / Ps 33:2-3. 11-12. 20-21 / Lk 1:39-45

December 21, Saturday

Dawn Mass (Liturgy of December 21)

MASS: Comm of BVM in Adv, GL, Pf II of Adv. White. (Phil. RM p. 1274)

RDGS: Sg 2:8-14 or Zep 3:14-18 / Ps 33:2-3. 11-12. 20-21 / Lk 1:39-45

Evening Mass

MASS: Use the liturgy of the 4th Sun of Adv, GL, CR, Pf II of Adv. White.

RDGS: Mi 5:1-4 / Ps 80:2-3. 15-16. 18-19 / Heb 10:5-10 / Lk 1:39-45

December 22, 4th Sunday of Advent

Dawn Mass

MASS: Use the liturgy of the 4th Sun of Adv, GL, CR, Pf II of Adv. White.

RDGS: Mi 5:1-4 / Ps 80:2-3. 15-16. 18-19 / Heb 10:5-10 / Lk 1:39-45

Evening Mass

MASS: Use the liturgy of the 4th Sun of Adv, GL, CR, Pf II of Adv. White.

RDGS: Mi 5:1-4 / Ps 80:2-3. 15-16. 18-19 / Heb 10:5-10 / Lk 1:39-45

December 23, Monday

Dawn Mass (Liturgy of December 23)

MASS: Comm of BVM in Adv, GL, Pf II of Adv. White. (Phil. RM p. 1276)

RDGS: Mal 3:1-4. 23-24 / Ps 25:4-5. 8-9.10. 14 / Lk 1:57-66

Evening Mass (Liturgy of December 24)

MASS: Comm of BVM in Adv, GL, Pf II of Adv. White. (Phil. RM p. 1277)

RDGS: 2 Sm 7:1-5. 8-12. 14. 16 / Ps 89:2-3. 4-5. 27. 29 / Lk 1:67-79

December 24, Tuesday

Dawn Mass (Liturgy of December 24)

MASS: Comm of BVM in Adv, GL, Pf II of Adv. White. (Phil. RM p. 1277)

RDGS: 2 Sm 7:1-5. 8-12. 14. 16 / Ps 89:2-3. 4-5. 27. 29 / Lk 1:67-79

ANG MISA NG SAMBAYANAN

PASIMULA

Kapag natitipon na ang sambayanan, ang pari at mga tagapaglingkod ay lalakad patungo sa altar, samantalang ang awiting pambungad ay ginaganap.

Pagsapit sa dambana, ang pari at mga tagapaglingkod ay magbibigay-galang alinsunod sa hinihinging paraan. Magbibigay-galang ang pari sa dambana sa pamamagitan ng paghalik sa ibabaw ng altar. Kung minamabuti niya, maiinsensuhan niya ito. Pagkatapos, ang pari ay paroroon sa kanyang upuan.

Matapos ang awiting pambungad, habang nakatayo ang lahat, ang pari at ang mga tao ay magkukrus. Ipahahayag ng pari nakaharap sa mga tao:

Sa ngalan ng Ama
at ng Anak at ng Espiritu Santo.

Sasagot ang mga tao:

Amen.

Ilalahad ng pari ang kanyang mga kamay bilang pagbati sa mga tao, habang ipinahahayag:

**Ang pagpapala ng ating Panginoong Hesukristo,
ang pag-ibig ng Diyos Ama,
at ang pakikipagkaisa ng Espiritu Santo
nawa'y sumainyong lahat.**

Sasagot ang mga tao:

At sumaiyo rin.

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.



Susunod na gaganapin ang pagsisisi sa kasalanan. Aanyayahan ng pari ang mga tao:

**Mga kapatid,
aminin natin ang ating mga kasalanan
upang tayo'y maging marapat gumanap
sa banal na pagdiriwang.**

Magkakaroon ng saglit na katahimikan. Pagkatapos nito, lahat ay sabay-sabay na aamin sa nagawang kasalanan:

Inaamin ko sa makapangyarihang Diyos
at sa inyo, mga kapatid,
na lubha akong nagkasala

Ang lahat ay dadagok sa dibdib.

sa isip, sa salita, sa gawa
at sa aking pagkukulang.
Kaya isinasamo ko
sa Mahal na Birheng Maria,
sa lahat ng mga anghel at mga banal
at sa inyo, mga kapatid,
na ako'y ipanalangin sa Panginoong ating Diyos.

Ipahahayag ng pari ang pagpapatawad:

**Kaawaan tayo ng makapangyarihang Diyos,
patawarin tayo sa ating mga kasalanan,
at patnubayan tayo sa buhay na walang hanggan.**

Sasagot ang mga tao:

Amen.



PANGINOON, KAAWAAN MO KAMI

Isusunod ang mga pagluhog na "Panginoon, kaawaan mo kami."

P. Panginoon, kaawaan mo kami.

B. Panginoon, kaawaan mo kami.

P. Kristo, kaawaan mo kami.

B. Kristo, kaawaan mo kami.

P. Panginoon, kaawaan mo kami.

B. Panginoon, kaawaan mo kami.

PAPURI SA DIYOS

Kapag nakatakdang ganapin, aawitin o darasalin ang awit:

Papuri sa Diyos sa kaitaasan
at sa lupa'y kapayapaan sa mga taong kinalulugdan niya.
Pinupuri ka namin,
dinarangal ka namin,
sinasamba ka namin,
ipinagbubunyi ka namin,
pinasasalamatan ka namin,
dahil sa dakila mong angking kapurihan.
Panginoong Diyos, Hari ng langit,
Diyos, Amang makapangyarihan sa lahat.
Panginoong Hesukristo, Bugtong na Anak,
Panginoong Diyos, Kordero ng Diyos, Anak ng Ama.
Ikaw na nag-aalis ng mga kasalanan ng sanlibutan,
maawa ka sa amin.
Ikaw na nag-aalis ng mga kasalanan ng sanlibutan,
tanggapin mo ang aming kahilingan.
Ikaw na naluluklok sa kanan ng Ama,
maawa ka sa amin.



Sapagka't ikaw lamang ang banal,
ikaw lamang ang Panginoon,
ikaw lamang, O Hesukristo, ang Kataas-taasan,
kasama ng Espiritu Santo
sa kadakilaan ng Diyos Ama.
Amen.

PANALANGING PAMBUNGAD

Pagkaraan, magkadaop ang mga kamay na ipahahayag ng pari:

Manalangin tayo.

Ang lahat kaisa ng pari ay tahimik na manalangin nang saglit. Pagkalipas ng ilang sandali, ilalahad ng pari ang kanyang kamay at ipahahayag ang panalanging pambungad. Sa katapusan nito'y sasagot ang mga tao ng pagbubunyi:

Amen.



PAGPAPAHAYAG NG SALITA NG DIYOS

UNANG PAGBASA

Paroroon sa pook ng pagbasa ang maglalahad ng Salita ng Diyos. Habang ipinahahayag niya ang unang pagbasa, ang lahat ay nakaupong makikinig. Upang ipahiwatig ang katapusan ng pagbasa, ihahayag ng tagapaglahad:

Ang Salita ng Diyos.

Sasagot ang lahat:

Salamat sa Diyos.

SALMONG TUGUNAN

Ang tagapaglahad ng salmo o taga-awit ay magpapahayag ng akda mula sa Aklat ng mga Awit at ang mga tao ay tutugon ng kaukulang taludtod.

IKALAWANG PAGBASA

Pagkatapos, kung mayroong ikalawang pagbasa, ipahahayag din ito sa pook ng pagbasa katulad ng nauna. Upang ipahiwatig ang katapusan ng pagbasa, ihahayag ng tagapaglahad:

Ang Salita ng Diyos.

Sasagot ang lahat:

Salamat sa Diyos.



ALELUYA

Isusunod ang Aleluya o ang ibang awit.

Samantalang ginaganap ang pag-awit, maglalagay ng insenso sa insensaryo ang pari kung minamabuting gamitin ito. Pagkaraan, ang diyakonong magpapahayag ng Mabuting Balita ay yuyuko sa harap ng pari at hihilingin niya ang pagpapala sa mahinang tinig:

Padre, ako po ay inyong gawaran ng pagpapala.

Ang pari ay mangungusap nang mahina:

**Sa iyong puso at sa iyong mga labi
manahan nawa ang Panginoon
upang marapat mong maipahayag
ang kanyang Mabuting Balita,
sa ngalan ng Ama at ng Anak ✠ at ng Espiritu Santo.**

Ang diyakono ay sasagot:

Amen.

Kapag walang diyakono, ang paring nakayuko sa gawing dambana ay magdarasal nang pabulong:

**Makapangyarihang Diyos,
gawin mong dalisay ang aking puso at mga labi
upang marapat kong maipahayag ang Mabuting Balita.**



MABUTING BALITA

Pagkaraan, ang diyakono o ang pari ay paroroon sa pook ng pagbasa. Magagawa ito ng paprusisyon na nilalahukan ng mga tagapaglingkod na may dalang insensaryo at mga kandila. Sa pook ng pagbasa, ihahayag ng tagapaglahad:

Sumainyo ang Panginoon.

Sasagot ang mga tao:

At sumaiyo rin.

Ihahayag ng diyakono o pari:

✠ Ang Mabuting Balita ng Panginoon ayon kay N.

Samantala'y kukrusan niya ang aklat, ang kanyang noo, ang kanyang bibig, at ang kanyang dibdib.

Magbubunyi ang mga tao:

Papuri sa iyo, Panginoon.

Pagkaraan, iinsensuhan ng diyakono o ng pari ang aklat kung ginagamit ang insenso at ipahahayag niya ang Mabuting Balita.

Sa katapusan, ihahayag niya:

Ang Mabuting Balita ng Panginoon.

Magbubunyi ang lahat:

Pinupuri ka namin, Panginoong Hesukristo.

Hahalikan ang aklat habang dinarasal ng pabulong:

**Magbunga nawa itong pagpapahayag ng Mabuting Balita
ng pagkapawi ng mga kasalanan.**



HOMILIYA

Pagkaraan, gaganapin ang homiliya na dapat ilahad sa lahat ng araw ng Linggo at sa mga pistang pangilin. Ito ay kapuri-puring gawin sa iba pang araw.

PAGPAPAHAYAG NG PANANAMPALATAYA

Kasunod ng homiliya ang pagpapahayag ng pananampalataya kapag ito ay nakatakda.

Sumasampalataya ako
sa Diyos Amang makapangyarihan sa lahat,
na may gawa ng langit at lupa.
Sumasampalataya ako kay Hesukristo,
iisang Anak ng Diyos, Panginoon nating lahat.
Nagkatawang-tao siya lalang ng Espiritu Santo,
ipinanganak ni Santa Mariang Birhen.
Pinagpakasakit ni Poncio Pilato,
ipinako sa krus, namatay, inilibing.
Nanaog sa kinaroroonan ng mga yumao.
Nang may ikatlong araw nabuhay na mag-uli.
Umakyat sa langit.
Naluluklok sa kanan ng Diyos
Amang makapangyarihan sa lahat.
Doon magmumulang paririto
at huhukom sa nangabubuhay at nangamatay na tao.
Sumasampalataya naman ako
sa Diyos Espiritu Santo,
sa banal na Simbahang Katolika,
sa kasamahan ng mga banal,
sa kapatawaran ng mga kasalanan,
sa pagkabuhay na muli ng nangamatay na tao
at sa buhay na walang hanggan.
Amen.

PANALANGIN NG BAYAN

Pagkatapos ay gaganapin ang panalangin ng bayan o panalanging pangkalahatan.



PAGDIRIWANG NG HULING HAPUNAN

Pagkatapos, sisimulan ang awit ng pag-aalay. Samantalang ito'y ginaganap, ilalagay ng mga tagapaglingkod ang telang patungan ng Katawan ni Kristo, ang pamahiran, ang kalis, at ang Aklat ng Pagmimisa sa ibabaw ng dambana.

Nababagay na ang pakikiisa ng mga nagsisimba ay ipahayag sa pamamagitan ng prusisyon ng pag-aalay ng tinapay at alak at ng iba pang handog para sa Simbahan at para sa mga dukha.

Ngayon nama'y tatayo ang pari sa gawing gitna ng dambana, hahawakan niya ang pinggan ng tinapay nang bahagyang nakaangat sa dambana, habang dinarasal niya nang pabulong:

Kapuri-puri ka, Diyos Amang Lumikha sa sanlibutan.
Sa iyong kagandahang-loob, narito ang aming maiaalay.
Mula sa lupa at bunga ng aming paggawa ang tinapay na ito
para maging pagkaing nagbibigay-buhay.

Ilalagay niya ang pinggan ng tinapay sa telang patungan ng Katawan ni Kristo.

Kapag hindi ginaganap ang awit ng pag-aalay, ang mga pangungusap na ito ay madarasal nang malakas ng pari at sa katapusan makapagbubunyi ang mga tao:

Kapuri-puri ang Poong Maykapal ngayon at kailanman!

Ang diyakono o ang pari ay magbubuhos ng alak at kaunting tubig sa kalis habang dinarasal nang pabulong:

Sa paghahalong ito ng alak at tubig
kami nawa'y makasalo sa pagka-Diyos ni Kristo
na nagpagindapat makihati sa aming pagkatao.



Pagbalik sa gawing gitna ng dambana, hahawakan ng pari ang kalis nang bahagyang nakaangat sa dambana habang dinarasal niya nang pabulong:

Kapuri-puri ka, Diyos Amang Lumikha sa sanlibutan.
Sa iyong kagandahang-loob, narito ang aming maiaalay.
Mula sa katas ng ubas
at bunga ng aming paggawa ang alak na ito
para maging inuming nagbibigay ng iyong Espiritu.

Illapag niya ang kalis sa telang patungan ng Katawan ni Kristo.

Kapag hindi ginaganap ang awit ng pag-aalay, ang mga pangungusap na ito ay madarasal nang malakas ng pari at sa katapusan makapagbubunyi ang mga tao:

Kapuri-puri ang Poong Maykapal ngayon at kailanman!

Pagkatapos, yuyuko ang pari habang dinarasal niya nang pabulong:

Diyos Amang Lumikha, nakikiusap kaming mga makasalanan.
Tanggapin mo ang aming pagsisisi bilang handog
upang kami'y matutong sumunod sa iyo nang buong puso.

Kung minamabuting gawin, iinsensuhan ng pari ang mga alay at ang dambana pagkaraa'y iinsensuhan ng diyakono o ng tagapaglingkod ang pari at ang mga nagsisimba.

Pagkatapos, ang pari ay pupunta sa gilid ng dambana, maghuhugas siya ng mga kamay samantalang pabulong niyang dinarasal:

O Diyos kong minamahal,
kasalanan ko'y hugasan
at linisin mong lubusan
ang nagawa kong pagsuway.



Pagbalik ng pari sa gawing gitna ng dambana, ilalahad niya ang kanyang mga kamay sa mga tao at muli niyang pagdaraupin habang kanyang ipinahahayag:

**Manalangin kayo, mga kapatid,
upang ang paghahain natin ay kalugdan
ng Diyos Amang makapangyarihan.**

Sasagot ang mga tao:

Tanggapin nawa ng Panginoon
itong paghahain sa iyong mga kamay
sa kapurihan niya at karangalan
sa ating kapakinabangan
at sa buong Sambayanan niyang banal.

PANALANGIN UKOL SA MGA ALAY

Pagkaraa'y, ilalahad ng pari ang kanyang mga kamay at darasalin niya ang panalangin ukol sa mga alay. Sa katapusan nito'y sasagot ang mga tao ng pagbubunyi:

Amen.



IKALAWANG PAGBUBUNYI O PREPASYO SA PANAHAON NG PAGDATING

Ang paghihintay para sa dalawang pagdating ni Kristo

Ngayo'y sisimulan ng pari ang Panalangin ng Pagpupuri at Pagpapasalamat. Ilalahad niya ang kanyang mga kamay habang kanyang sinasabi:

P. Sumainyo ang Panginoon.

B. At sumaiyo rin.

Pagkaraa'y isusunod niya habang itinataas niya ang kanyang mga kamay:

P. Itaas sa Diyos ang inyong puso at diwa.

B. Itinaas na namin sa Panginoon.

Habang nakataas ang mga kamay, kanyang ipahahayag:

P. Pasalamatan natin ang Panginoong ating Diyos.

B. Marapat na siya ay pasalamatan.

Ipagpapatuloy ng pari ang Pagbubunyi o Prepasyo nang nakalahad ang mga kamay.

Ama naming makapangyarihan,
tunay ngang marapat
na ikaw ay aming pasalamatan
sa pamamagitan ni Hesukristo
na aming Panginoon.

Ang pagsusugo mo sa kanya
ay ipinahayag ng lahat ng mga propeta.
Ang pagsilang niya'y pinanabikan
ng Mahal na Birheng kanyang Inang tunay
sa kapangyarihan ng Espiritung Banal.
Ang pagdating niya'y inilahad
ni San Juan Bautista sa kanyang pagbibinyag.
Ngayong pinaghahandaan namin
ang maligayang araw ng kanyang pagsilang,
kami'y nananabik at nananalanging
lubos na makaharap sa kanyang kadakilaan.



Kaya kaisa ng mga anghel
na nagsisiawit ng papuri sa iyo
nang walang humpay sa kalangitan,
kami'y nagbubunyi sa iyong kadakilaan:

SANTO

Sa katapusan nito, pagdaraupin niya ang mga kamay niya samantalang kanyang pinaabot sa hantungan ang Pagbubunyi o Prepasyo ngayong kaisa ng sambayanan kanyang inaawit o binibigkas nang malakas:

Santo, Santo, Santo
Panginoong Diyos ng mga hukbo!
Napupuno ang langit at lupa
ng kadakilaan mo!
Osana sa kaitaasan!
Pinagpala ang mga naparirito
sa ngalan ng Panginoon!
Osana sa kaitaasan!



IKALAWANG PANALANGIN NG PAGPUPURI AT PAGPAPASALAMAT

Nakalahad ang mga kamay ng pari sa pagdarasal.

Ama naming banal,
ikaw ang bukal ng tanang kabanalan.

Pagdaraupin ng pari ang kanyang mga kamay at lulukuban ng mga kamay niya ang mga alay habang siya'y nagdarasal.

**Kaya't sa pamamagitan ng iyong Espiritu
gawin mong banal ang mga kaloob na ito**

Pagdaraupin ng pari ang kanyang mga kamay at kukrusan niya ang tinapay at kalis, samantalang kanyang dinarasal:

**upang para sa ami'y maging Katawan at Dugo ✠
ng aming Panginoong Hesukristo.**

Pagdaraupin niya ang kanyang mga kamay.

Ang mga salita ng Panginoon sa mga sumusunod na pangungusap ay ipahahayag nang malinaw at nauunawaan ng tanan ayon sa hinihingi ng kahulugan ng mga ito.

**Bago niya pinagtiisang kusang loob
na maging handog,**

Hahawakan ng pari ang tinapay nang bahagyang nakataas sa ibabaw ng dambana habang kanyang patuloy na inihahayag:

**hinawakan niya ang tinapay,
pinasalamatan ka niya,
pinaghati-hati niya iyon,
iniabot sa kanyang mga alagad
at sinabi:**

Bahagyang yuyuko ang pari.

TANGGAPIN NINYONG LAHAT ITO AT KANIN:
ITO ANG AKING KATAWAN
NA IHAHANDOG PARA SA INYO.



Ipamamalas niya ang ostiyang itinalagang maging Katawan ni Kristo, ipapatong niya ito sa pinggan, at luluhod siya bilang pagsamba.

Ang pari ay magpapatuloy.

Gayun din naman, noong matapos ang hapunan,

Hahawakan ng pari ang kalis nang bahagyang nakataas sa ibabaw ng dambana habang kanyang patuloy na inihahayag:

**hinawakan niya ang kalis,
muli ka niyang pinasalamatan,
iniabot niya ang kalis sa kanyang mga alagad
at sinabi:**

Bahagyang yuyuko ang pari.

TANGGAPIN NINYONG LAHAT ITO AT INUMIN:
ITO ANG KALIS NG AKING DUGO
NG BAGO AT WALANG HANGGANG TIPAN,
ANG AKING DUGO NA IBUBUHOS
PARA SA INYO AT PARA SA LAHAT
SA IKAPAGPAPATAWAD NG MGA KASALANAN.

GAWIN NINYO ITO SA PAG-ALALA SA AKIN.

Ipamamalas niya ang kalis, ipapatong niya ito sa telang patungan ng Katawan ni Kristo, at luluhod siya bilang pagsamba.

Pagkatapos, ipahahayag ng pari:

Ipagbunyi natin ang misteryo ng pananampalataya.

Ang mga tao ay magbubunyi:

Aming ipinahahayag
na namatay ang 'yong Anak,
nabuhay bilang Mesiyas
at magbabalik sa wakas
para mahayag sa lahat.



Ilalahad ng pari ang kanyang mga kamay samantalang siya ay nagdarasal:

Ama,
ginagawa namin ngayon ang pag-alala
sa pagkamatay at muling pagkabuhay ng iyong Anak
kaya't iniaalay namin sa iyo
ang tinapay na nagbibigay-buhay
at ang kalis na nagkakaloob ng kaligtasan.
Kami'y nagpapasalamat
dahil kami'y iyong minarapat
na tumayo sa harap mo
para maglingkod sa iyo.

Isinasamo naming kaming magsasalu-salo
sa Katawan at Dugo ni Kristo
ay mabuklod sa pagkakaisa
sa pamamagitan ng Espiritu Santo.

Isa sa mga nakikipagmisa:

Ama,
lingapin mo ang iyong Simbahang
laganap sa buong daigdig.
Puspusin mo kami sa pag-ibig
kaisa ni **Francisco**, na aming Papa
at ni **N.**, na aming Obispo,
at ng tanang kaparian.



Isa sa mga nakikipagmisa:

Alalahanin mo rin ang mga kapatid naming nahimlay
nang may pag-asang sila'y muling mabubuhay
gayun din ang lahat ng mga pumanaw.
Kaawaan mo sila at patuluyin sa iyong kaliwanagan.
Kaawaan mo at pagindapatin kaming lahat
na makasalo sa iyong buhay na walang wakas.
Kaisa ng Mahal na Birheng Maria na Ina ng Diyos,
ng kanyang kabiyak ng puso, si San Jose,
kaisa ng mga apostol at ng lahat ng mga banal
na namuhay dito sa daigdig nang kalugud-lugod sa iyo,
maipagdiwang nawa namin ang pagpupuri sa ikararangal mo.

Pagdaraupin ng pari ang kanyang mga kamay.

sa pamamagitan ng iyong Anak
na aming Panginoong Hesukristo.

Hahawakan ng pari ang pinggang may ostiya at ang kalis na kapwa niya itataas habang
kanyang ipinahahayag.

SA PAMAMAGITAN NI KRISTO, KASAMA NIYA, AT SA KANYA
ANG LAHAT NG PARANGAL AT PAPURI AY SA IYO,
DIYOS AMANG MAKAPANGYARIHAN,
KASAMA NG ESPIRITU SANTO
MAGPASAWALANG HANGGAN.

Ang mga tao ay magbubunyi:

Amen.



ANG PAKIKINABANG

Pagkalapag ng kalis at pinggan sa dambana, ipahahayag ng pari nang may magkadaop na mga kamay:

Sa tagubilin ng mga nakagagaling na utos
at turo ni Hesus na Panginoon natin at Diyos
ipahayag natin nang lakas-loob:

Illalahad ng pari ang kanyang mga kamay at ipahahayag niya kaisa ng lahat

Ama namin, sumasalangit ka.
Sambahin ang ngalan mo.
Mapasaamin ang kaharian mo.
Sundin ang loob mo
dito sa lupa para nang sa langit.

Bigyan mo kami ngayon
ng aming kakanin sa araw-araw.
At patawarin mo kami sa aming mga sala
para nang pagpapatawad namin
sa nagkakasala sa amin.
At huwag mo kaming ipahintulot sa tukso.
At iadya mo kami sa lahat ng masama.

Nakalahad ang mga kamay ng pari sa pagdarasal:

Hinihiling naming
kami'y iadya sa lahat ng masama,
pagkalooban ng kapayapaan araw-araw,
iiigtas sa kasalanan
at ilayo sa lahat ng kapahamakan
samantalang aming pinananabikan
ang dakilang araw ng pagpapahayag
ng Tagapagligtas naming si Hesukristo.



Pagdaraupin niya ang kanyang mga kamay. Wawakasan ng sambayanan ang panalangin sa ganitong pagbubunyi:

Sapagkat iyo ang kaharian
at ang kapangyarihan at ang kapurihan
magpakailanman! Amen.

Pagkatapos, malakas na darasalin ng pari nakalahad ang mga kamay:

Panginoong Hesukristo,
sinabi mo sa iyong mga Apostol:
“Kapayapaan ang iniwan ko sa inyo.
Ang aking kapayapaan ang ibinibigay ko sa inyo.”
Tunghayan mo ang aming pananampalataya
at huwag ang aming mga pagkakasala.
Pagkalooban mo kami ng kapayapaan
at pagkakaisa ayon sa iyong kalooban.

Pagdaraupin niya ang kanyang mga kamay.

kasama ng Espiritu Santo magpasawalang hanggan.

Sasagot ang mga tao:

Amen.

Ang pari ay paharap sa sambayanang maglalahad at magdaraop ng mga kamay sa pagpapahayag.

Ang kapayapaan ng Panginoon ay laging sumainyo.

Sasagot ang mga tao:

At sumaiyo rin.

Maidaragdag, kung minabuti, ang paanyayang ipahahayag ng diyakono o pari:

Magbigayan kayo ng kapayapaan sa isa’t isa.

At, alinsunod sa kaugalian ng iba’t-ibang pook, ang mga nagsisimba ay mabigbigyan ng kapayapaan. Ang pari at ang mga tagapaglingkod ay makapagbibigyan ng kapayapaan.



Pagkatapos, hahawakan ng pari ang ostiya at hahati-hatiin niya ito sa ibabaw ng pinggan at isasawak niya ang kaputol sa kalis habang pabulong niyang dinarasal:

**Sa pagsasawak na ito
ng Katawan sa Dugo ng aming Panginoong Hesukristo
tanggapin nawa namin sa pakikinabang
ang buhay na walang hanggan.**

Samantalang ginaganap ang paghahati-hati sa ostiya, aawitin o darasalin ang pagluhog na ito.

Kordero ng Diyos,
na nag-aalis ng mga kasalanan ng sanlibutan,
maawa ka sa amin.
Kordero ng Diyos,
na nag-aalis ng mga kasalanan ng sanlibutan,
maawa ka sa amin.
Kordero ng Diyos,
na nag-aalis ng mga kasalanan ng sanlibutan,
ipagkaloob mo sa amin ang kapayapaan.

Ito ay mauulit-ulit habang ginaganap ang paghahati-hati sa tinapay. Sa huling, pag-uulit saka pa lamang idurugtong ang “ipagkaloob mo sa amin ang kapayapaan.”

Magkadaop ang mga kamay ng pari sa pabulong na pagdarasal.

**Panginoong Hesukristo, Anak ng Diyos na buhay,
sa kalooban ng Ama kasama ng Espiritu Santo,
binuhay mo sa iyong pagkamatay ang sanlibutan.
Pakundangan sa iyong banal na Katawan at Dugo,
iadya mo ako sa tanang aking kasalananat lahat ng masama,
gawin mong ako’y makasunod lagi sa iyong mga utos,
at huwag mong ipahintulot na ako’y mawalay sa iyo kailanman.**

o kaya:

**Ang pakikinabang sa Katawan at Dugo mo,
Panginoong Hesukristo,
ay huwag nawang magdulot ng paghuhukom
at parusa sa kasalanan ko.
Alang-alang sa iyong dakilang pag-ibig
nawa'y aking matanggap
ang pagkupkop mo sa akin at kaloob mong lunas.**

Luluhod ang pari at pagtayo niya'y kanyang hahawakan ang ostiya na itataas sa ibabaw ng pinggan. Paharap sa mga tao siyang magsasabi ng malakas:

**Ito ang Kordero ng Diyos.
Ito ang nag-aalis ng mga kasalanan ng sanlibutan.
Mapalad ang mga inaanyayahan sa kanyang piging.**

Idurugtong niyang minsanan kaisa ng sambayanan:

Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Siya'y makikinabang nang magalang at nakayuko sa dambana habang pabulong na nagdarasal:

**Ipagsanggalang nawa ako ng Katawan ni Kristo
para sa buhay na walang hanggan.**

Mapitagan niyang tatanggapin ang Katawan ni Kristo.

Pagkatapos, hahawakan ng pari ang kalis at pabulong na magdarasal:

**Ipagsanggalang nawa ako ng Dugo ni Kristo
para sa buhay na walang hanggan.**

Mapitagan niyang tatanggapin ang Dugo ni Kristo.



Hahawakan niya ang pinggan o lalagyan ng ostiya at lalapitan niya ang mga nakikinabang, bahagyang itataas ang ostiya para sa bawat nakikinabang habang sinasabi:

Katawan ni Kristo.

Ang nakikinabang ay tutugon:

Amen.

Samantalang nakikinabang ang pari, sisimulan ang awit sa pakikinabang.

Pagkapakinabang, ang mga mumo ng ostiya na nasa pinggan ay titipunin sa kalis na huhugasan ng pari o diyakono o tagapaglingkod. Habang ito ay ginaganap ng pari, pabulong siyang magdarasal:

**Ama naming mapagmahal,
ang aming tinanggap ngayon
ay amin nawang mapakinabangan
at ang iyong ipinagkaloob
ay magdulot nawa sa amin
ng kagalingang pangmagpakailanman.**

Makababalik ngayon sa upuan ang pari. Makapag-uukol ng ilang saglit na katahimikan o makaaawit ng papuri o salmo.



PANALANGIN PAGKAPAKINABANG

Pagkaraan, ang pari ay titindig sa harap ng upuan o sa gawi ng dambana paharap sa mga nagsisimbang magpapahayag:

Manalangin tayo.

Kung di pa nagaganap ang tahimik na pagdalangin, ito ay gagawin ngayon, at pagkaraan, ang panalangin pagkapakinabang ay ipahahayag ng pari nakalahad ang mga kamay. Sa katapusan, ang sambayanan ay tutugon.

Amen.



PAGHAYO SA PAGWAWAKAS

Maisusunod kapag may ipagbibigay-alam, ang mga maiikling patalastas na sasabihin sa mga tao.

Pagkatapos, gaganapin ang paghayo. Ang pari na nakalahad ng mga kamay sa mga tao ay magpapahayag:

Sumainyo ang Panginoon.

Sasagot ang lahat:

At sumaiyo rin.

Ang diyakono o ang pari na rin kapag walang diyakono ang magpapahayag ng paanyaya:

Magsiyuko tayo habang iginagawad ang pagbabasbas.

Pagkaraan, itataas ng pari ang kanyang mga kamay na lumulukob sa lahat, samantalang inaawit o ipinahahayag niya ang mga pagbabasbas.

**Ang makapangyarihang Diyos Ama ng Bugtong na Anak
na naparito na noon at hinihintay nating bumalik ngayon
ay siya nawang magpabanal sa inyo
pakundangan sa liwanag ng kanyang pagdating
at siya rin nawang pumuspos sa inyo sa pagpapala
ngayon at magpasawalang hanggan.**

Sasagot ang lahat:

Amen.

Ipahahayag ng pari:

**Patatagin nawa niya kayo sa pananampalataya,
paligayahin sa pag-asa,
at pakilusin sa pag-ibig na puspos ng sigla
ngayon at magpasawalang hanggan.**



Sasagot ang mga tao:

Amen.

Ipahahayag ng pari:

**Kayong nagagalak sa pagdating
ng nagkatawang-taong Manunubos
ay puspusin nawa niya ng gantimpalang buhay na di matatapos
kapag siya'y dumating nang may kadakilaang lubos
magpasawalang hanggan.**

Sasagot ang lahat:

Amen.

Babasbasan ng pari ang mga tao habang kanyang ipinahahayag.

**Pagpalain kayo ng makapangyarihang Diyos,
Ama at Anak ✠ at Espiritu Santo.**

Sasagot ang lahat:

Amen.

Ang diyakono o ang pari na magkadaop ang mga kamay ay magpapahayag ng paghayo sa sambayanan:

Humayo kayong taglay ang kapayapaan
upang ang Panginoon ay mahalin at paglingkuran.

Sasagot ang mga tao:

Salamat sa Diyos.

Karaniwan, ang dambana ay bibigyang-paggalang sa paghalik dito ng pari at matapos makapagbigay-pitagan kaisa ng mga tagapaglingkod, siya ay hahayo.





MISA DE AGUINALDO

(Mga Panalangin at Pagbasa)

IKA-15 NG DISYEMBRE

IKATLONG LINGGO SA PANAHOON NG PAGDATING NG PANGINOON

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
ang Ikatlong Linggo ng Adbiyento
ay Linggo ng *Gaudete*,
o Linggo ng pagsasaya at pagbubunyi.
Habang papalapit ang Kapaskuhan,
inaanyayahan tayong magsaya
sapagkat nababanaag na ang pagsilang
ng ating dakilang Manunubos.
Siya ang magliligtas sa atin mula sa pagkakasala
at magbibigay ng buhay na walang hanggan.
Magalak tayo sapagkat tayong lahat
ay ninais niyang makibahagi sa biyayang ito.



PANALANGING PAMBUNGAD

Ama naming makapangyarihan,
tunghayan mo ang pananabik ng iyong sambayanan
sa Pasko ng Pagsilang ng Panginoon naming mahal.
Pasapitin mo kami sa kagalakang dulot ng kanyang pagtubos
at pasiglahin mo kami sa pagpapasalamat sa iyong kaloob
sa pamamagitan niya kasama ng Espiritu Santo
magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Sofonias 3, 14-18a

Masayang aawit ang Panginoon sa laki ng kagalakan

Pagbasa mula sa aklat ni propeta Sofonias

Umawit ka nang malakas, Lungsod ng Sion;
sumigaw ka, Israel!
Magalak ka nang lubusan, Lungsod ng Jerusalem!
Ang mga nagpaparusa sa iyo ay inalis na ng Panginoon,
at itinaon niya ang inyong mga kaaway.
Nasa kalagitnaan mo ang Hari ng Israel, ang Panginoon;
wala nang kasawiang dapat pang katakutan.
Sa araw na yaon ay sasabihin sa Jerusalem:
“Huwag kang matakot, Sion;
huwag manghina ang iyong loob.
Nasa piling mo ang Panginoong iyong Diyos,
parang bayaning nagtagumpay;
makikigalak siya sa iyong katuwaan,
babaguhin ka ng kanyang pag-ibig;
at siya’y masayang aawit sa laki ng kagalakan,
gaya ng nagdiriwang sa pista.”

Ang Salita ng Diyos.



SALMONG TUGUNAN

Isaias 12, 2-3. 4bkd. 5-6

T. D'yos na kapiling ng bayan
ay masayang papurihan.

Ang Diyos ang siyang nagliligtas sa akin,
tiwalang-tiwala ako at wala munti mang pangamba.
Sapagkat ang Poon ang lahat sa akin,
Siya ang aking awit, ang aking kaligtasan.
Malugod kayong sasalok ng tubig
Sa batis ng kaligtasan.

T. D'yos na kapiling ng bayan
ay masayang papurihan.

“Umawit kayo ng papuri Poon,
sapagkat kahanga-hanga ang kanyang mga ginawa,
ipinahayag ninyo ito sa buong daigdig.
Mga anak ng Sion, umawit kayo nang buong galak,
sapagkat nasa piling ninyo ang dakila at
ang Banal ng Israel.”

T. D'yos na kapiling ng bayan
ay masayang papurihan.



IKALAWANG PAGBASA

Filipos 4, 4-7
Malapit nang dumating ang Panginoon.

Pagbasa mula sa sulat ni Apostol San Pablo
sa mga taga-Filipos

Mga kapatid:
Magalak kayong lagi sa Panginoon.
Inuulit ko, magalak kayo.

Ipadama ninyo sa lahat ang inyong kagandahang-loob.
Malapit nang dumating ang Panginoon.
Huwag kayong mabalisa tungkol sa anumang bagay.
Sa halip ay hingin ninyo sa Diyos
ang lahat ng inyong kailangan
sa pamamagitan ng panalanging may pasasalamat.
At ang di-malirip na kapayapaan ng Diyos
ang mag-iingat sa inyong puso at pag-iisip
sa pamamagitan ni Kristo Hesus.

Ang Salita ng Diyos.



ALELUYA

Isaias 61:1

T. Aleluya! Aleluya!
Espiritu ng Maykapal
nasa akin upang hat'dan
ang mga dukha ng aral.
T. Aleluya! Aleluya!

MABUTING BALITA

Lucas 3, 10-18
Ano ang gagawin namin?

✠ Ang Mabuting Balita ng Panginoon ayon kay San Lucas

Noong panahong iyon:
Tinanong si Juan Bautista ng mga tao,
“Kung gayun, ano po ang dapat naming gawin?”
“Kung mayroon kang dalawang baro,
bigyan mo ng isa ang wala.
Ganyan din ang gawin ng mga may pagkain,” tugon niya.
Dumating din ang mga publikano
upang pabinyag at itinanong nila sa kanya,
“Guro, ano po ang dapat naming gawin?”
Sumagot siya, “Huwag kayong sumingil
nang higit sa dapat singilin.”
Tinanong din siya ng mga kawal,
“At kami, ano naman ang dapat naming gawin?”
“Huwag kayong manghihingi kaninuman
sa pamamagitan ng pamimilit
o ng pagpapatang ng di totoo;
masiyahan kayo sa inyong sahod,” sagot niya.



Naghahari sa mga tao ang pananabik
sa pagdating ng Mesiyas
at ang akala ng marami'y si Juan ang kanilang hinihintay.
Kaya't sinabi ni Juan sa kanila,
"Binibinyagan ko kayo sa tubig,
ngunit ang darating na kasunod ko
ang magbibinyag sa inyo sa Espiritu Santo at sa apoy.
Siya'y makapangyarihan kaysa akin,
at ni hindi ako karapat-dapat magkalag
ng tali ng kanyang panyapak.
Hawak niya ang kanyang kalaykay
upang alisin ang dayami.
Titipunin niya ang trigo sa kanyang kamalig,
ngunit ang ipa'y susunugin sa apoy
na di mamamatay kailanman."

Marami pang bagay ang ipinangaral ni Juan sa mga tao
sa kanyang paghahayag ng Mabuting Balita.

Ang Mabuting Balita ng Panginoon.



PANALANGIN NG BAYAN

Buong galak at pagtitiwala nating idalangin sa Diyos Ama na sa pagdating ng kanyang Anak at Panginoon natin ay mas mapatibay pa ang ating pananampalataya, pag-asa, at pag-ibig. Sambitin natin:

T. Panginoon, dinggin mo kami.

Upang ang mga namumuno sa Simbahang Katolika ay mapuno ng pag-asa at kagalakan, at may lubos na sigasig sa pagbabahagi ng kaligtasan ni Hesukristo, manalangin tayo sa Panginoon.

T. Panginoon, dinggin mo kami.

Upang ang mga pinuno sa pamahalaan ay maglingkod sa diwa ng katotohanan, katapatan, at katarungan, at talikuran ang anumang uri ng katiwalian at di-makataong pagtrato sa mga mamamayan, manalangin tayo sa Panginoon.

T. Panginoon, dinggin mo kami.

Upang ang sambayanang Pilipino ay laging magsikap para sa pagkakaisa, kapayapaan, at kaunlaran sa ating bayan, manalangin tayo sa Panginoon.

T. Panginoon, dinggin mo kami.



**Upang ang mga maysakit,
mga nawawalan ng pag-asa, mga pinabayaan,
at mga biktima ng karahasan at kahirapan
ay makatagpo ng kalinga at pagmamahal sa Diyos
sa tulong ng kanilang pamilya at komunidad,
manalangin tayo sa Panginoon.**

T. Panginoon, dinggin mo kami.

**Para sa mga namatay na biktima ng digmaan, karahasan,
at pagmamalabis, maranasan nawa nila
ang galak at kapayapaan sa piling ng Panginoon,
manalangin tayo sa Panginoon.**

T. Panginoon, dinggin mo kami.

**Dakilang Diyos Ama,
dinggin mo ang aming mga kahilingan
upang mapuspos kami ng kagalakan
sa pagdating ng iyong Anak
na si Hesukristong aming Panginoon. Amen.**



PANALANGIN UKOL SA MGA ALAY

Ama naming Lumikha,
maihain nawang lubos
ang matapat naming paglilingkod
sa pagganap sa itinatag ng iyong Anak
at sa pakikinabang sa iyong pagtubos sa aming lahat
sa pamamagitan niya kasama ng Espiritu Santo
magpasawalang hanggan.

PANALANGIN PAGKAPAKINABANG

Ama naming mapagmahal,
ang pinagsaluhan namin ngayon
sa ikapagpapatawad ng mga kasalanan
ay magpagindapat nawang kami'y maging handa
para sa Pasko ng Pagsilang ng iyong Anak
na siyang namamagitan kasama ng Espiritu Santo
magpasawalang hanggan.



IKA-16 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwag tungkol sa buod ng Misang ipagdiriwang.

Mga minamahal na kapatid,
ngayon ay sinisimulan natin
ang masayang tradisyon ng Simbang Gabi.
Siyam na buwan sa sinapupunan ni Maria si Hesus
bago iniluwal sa sabsaban sa Betlehem.
Sa siyam na umaga,
mag-aalay tayo ng ating sakripisyo,
mga panalangin, at pagsisisi sa kasalanan.
Pagsapit ng Pasko,
nawa'y ang tapat nating pagsisimbang-gabi
ang maging regalo natin sa Sanggol
na magdiriwang ng kanyang kaarawan.



PANALANGING PAMBUNGAD

Ama naming makapangyarihan,
niloob mong ang iyong Salita na ibinalita ng anghel
ay maging taong totoo sa sinapupunan ng Mahal na Birhen.
Ipagkaloob mong kaming sumasampalatayang
siya'y Ina ng Diyos
ay matulungan niyang dumalangin sa iyo
sa pamamagitan ni Hesukristo
kasama ng Espiritu Santo magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Isaias 56:1-3. 6-8

Ang templo ko'y tatawaging bahay-dalanginan.

Pagbasa mula sa aklat ni propeta Isaias

Ang sabi ng Panginoon sa kanyang bayan:
“Ayon sa katarungan
at laging matuwid ang inyong gagawin.
Ang pagliligtas ko'y di na magluluwat,
ito ay darating, ito'y mahahayag sa inyong paningin.
Mapalad ang taong gumagawa nito,
ang anak ng taong ang tuntuni'y ito.
Ginaganap niya ang marapat gawin
sa Araw ng Pamamahinga,
sa gawang masama, ang kanyang sarili'y iniwas.”
Di dapat sabihin ng isang dayuhang nakipagkaisa
sa bayan ng Diyos,
na siya'y hindi papayagan ng Panginoon
na makisama sa pagsamba ng kanyang bayan.”
Ito naman ang sabi ng Panginoon sa mga dating dayuhan
na ngayo'y kabilang sa kanyang bayan,
buong pusong naglilingkod sa kanya,
nangingilin sa Araw ng Pamamahinga;
at matapat na nag-iingat sa kanyang tipan:
“Dadalhin ko kayo sa Sion, sa aking banal na bundok.
Ipadarama ko sa inyo ang kagalakan sa aking Templo.
Tatanggapin ko ang inyong mga handog,
at ang Templo ko'y tatawaging
bahay dalanginan ng lahat ng bansa.”
Ipinangako pa ng Panginoon,
sa mga Israelitang ibinalik niya mula sa pagkatapon,
na marami pa siyang isasama sa kanila
para mapabilang sa kanyang bayan.

Ang Salita ng Diyos.



SALMONG TUGUNAN

Salmo 66:2-3. 5. 7-8

T. Nawa'y magpuri sa iyo
ang lahat ng mga tao.

**O Diyos, pagpalain kami't kahabagan,
kami Panginoo'y iyong kaawaan,
upang sa daigdig mabatid ng lahat
ang iyong kalooban at ang pagliligtas.**

T. Nawa'y magpuri sa iyo
ang lahat ng mga tao.

**Nawa'y purihin ka ng mga nilikha,
pagkat matuwid kang humatol sa madla;
ikaw ang patnubay ng lahat ng bansa.**

T. Nawa'y magpuri sa iyo
ang lahat ng mga tao.

**Nag-aning mabuti ang mga lupain,
pinagpala kami ng Poon, Diyos namin!
Ang lahat sa ami'y iyong pinagpala,
nawa'y igalang ka ng lahat ng bansa.**

T. Nawa'y magpuri sa iyo
ang lahat ng mga tao.



ALELUYA

T. Aleluya! Aleluya!
Halina't kami'y dalawin.
Kapayapaan mo'y dalhin
upang umiral sa amin.
T. Aleluya! Aleluya!

MABUTING BALITA

Juan 5:33-36

Si Juan ay parang maningas na ilaw na nagliliwanag.

✠ Ang Mabuting Balita ng Panginoon ayon kay San Juan

Noong panahong iyon,
sinabi ni Hesus sa mga Judio,
“Nagpasugo kayo kay Juan,
at nagpatotoo siya tungkol sa katotohanan.
Hindi sa kailangan ko ang patotoo ng tao;
sinasabi ko lamang ito para maligtas kayo.
Si Juan ay parang maningas na ilaw na nagliliwanag noon,
at kayo'y sandaling nasiyahan sa kanyang liwanag.
Ngunit may patotoo tungkol sa akin
na higit sa patotoo ni Juan:
ang mga gawang ipinagagawa sa akin ng Ama,
at siya ko namang ginaganap
— iyan ang nagpapatotoo na ako'y sinugo niya.”

Ang Mabuting Balita ng Panginoon.



PANALANGIN NG BAYAN

**Manalangin tayo sa Ama na nagsugo kay Hesus,
ang tunay na ilaw ng mundo
na ipinakilala ni Juan Bautista sa madla.
Buong tiwala tayong manalangin:**

T. Panginoon, dinggin mo ang aming panalangin.

Manatili nawang tapat ang Santo Papa **Francisco,
mga obispo, at mga pari
sa sinumpaang nilang tungkulin na kilalanin, isabuhay,
at ibahagi si Hesukristo sa sanlibutan,
manalangin tayo sa Panginoon.**

T. Panginoon, dinggin mo ang aming panalangin.

**Matularan nawa namin ang dakilang pag-ibig ni Hesus
at ang malinis na kalooban ni Maria
na kapwa hangad ang kapakanan ng lahat ng tao,
manalangin tayo sa Panginoon.**

T. Panginoon, dinggin mo ang aming panalangin.

**Magnilay nawa kami sa buhay ng aming Inang Maria
na nanatiling nakatutok sa kalooban ng Diyos
sa halip na magambala ng ibang mga alalahanin,
manalangin tayo sa Panginoon.**

T. Panginoon, dinggin mo ang aming panalangin.



**Nawa gamitin ng mga pinuno sa pamahalaan
ang kanilang kapangyarihan para bigyang katuparan
ang mga pangarap ng mga kapus-palad na mga mamamayan,
manalangin tayo sa Panginoon.**

T. Panginoon, dinggin mo ang aming panalangin.

**Nawa ang mga sakripisyo namin sa siyam na madaling-araw
ay magbunga ng isang kaloobang may malinis na hangaring
magbalik-loob sa Diyos at lumingap sa kapwa,
manalangin tayo sa Panginoon.**

T. Panginoon, dinggin mo ang aming panalangin.

**Ama,
puspusin mo kami sa pag-ibig.
Sa paghahanda namin sa pagdating ng iyong Anak bilang tao,
nawa'y pag-alabin mo ang pag-asa sa aming mga puso.
Hinihiling namin ito sa pamamagitan
ni Kristong aming Panginoon. Amen.**



PANALANGIN UKOL SA MGA ALAY

Ama naming Lumikha,
ang mga alay naming nakahain sa iyong dambana
ay pabanalin nawa ng paglukob ng Banal na Espiritu
na pumuspos sa sinapupunan ng Mahal na Birheng Maria
upang magdalang-tao at magsilang sa iyong Anak
na siyang namamagitan magpasawalang hanggan.

PANALANGIN PAGKAPAKINABANG

Ama naming mapagmahal,
sa aming pagsasalo sa banal na hain
lagi nawa naming madama
ang iyong kagandahang-loob
upang kami'y magkamit ng kaligtasan
pakundangan sa pagkakatawang-tao ng iyong Anak
ngayong aming ginugunita ang kanyang Ina
sa pamamagitan din ni Hesukristo
kasama ng Espiritu Santo magpasawalang hanggan.



IKA-17 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
ayon kay San Mateo,
ang rurok ng kasaysayan ng Israel
ay ang pagsilang ng Mesiyas.
Kay Hesus natupad at nagkaroon ng kahulugan
ang kasaysayang ito.
Pumasok si Hesus sa masalimuot na kuwento ng mga tao.
Nawa matutunan din nating pahalagahan
ang ating kasaysayan
bilang mga taong naglalakbay sa lupa.



PANALANGING PAMBUNGAD

Ama naming makapangyarihan,
patawarin mo ang aming mga utang
sapagka't kami'y hindi makababayad nang lubusan
kaya't makaligtas nawa kaming tanan
pakundangan sa pagdalangin
ng Mahal na Birheng Ina ng Diyos
para sa aming kabutihan
sa pamamagitan ni Hesukristo,
kasama ng Espiritu Santo magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Genesis 49:2. 8-10

Ang setro ni Judang makapangyarihan ay tataglayin niya
hanggang dumating ang Haring tunay.

Pagbasa mula sa aklat ng Genesis

Noong mga araw na iyon,
tinawag ni Jacob ang mga anak niya
at kanyang sinabi:

“Kayo mga anak, magsilapit sa akin,
akong inyong ama ay sumandaling dinggin.
Ikaw, Juda, ay papupurihan
niyong mga anak ng Ina mong mahal,
hawak mo sa leeg ang iyong kaaway,
lahat mong kapatid sa iyo’y gagalang.
Mabangis na leon, ang iyong larawan,
muling nagkukubli matapos pumatay;
ang tulad ni Juda’y leong nahihimlay,
walang mangangahas lumapit sinuman.
Hawak niya’y setrong tuon sa paanan,
sagisag ng lakas at kapangyarihan;
ito’y tataglayin hanggang sa dumatal
ang tunay na Haring dito’y magtatangan.”

Ang Salita ng Diyos.



SALMONG TUGUNAN

Salmo 71:2. 3-4. 7-8. 17

T. Mabubuhay s'yang marangal
at sasagana kailanman.

**Turuan mo yaong haring humatol ng katuwiran:
sa taglay mong katarungan, O Diyos, siya'y bahaginan;
upang siya'y maging tapat mamahala sa'yong bayan,
at pati sa mahihirap maging tapat siyang tunay.**

T. Mabubuhay s'yang marangal
at sasagana kailanman.

**Ang lupain nawa niya'y umunlad at managana;
maghari ang katarungan sa lupain nitong bansa.
Maging tapat itong hari sa paghatol sa mahirap
at ang mga taong wala'y pag-ukulan ng paglingap.**

T. Mabubuhay s'yang marangal
at sasagana kailanman.

**Yaong buhay na mat'wid sa kanyang kapanahunan,
madama ng bansa niya at umunlad habang buhay.
Yaong kanyang kaharian ay palawak nang palawak,
mula sa ilog Eufrates, sa daigdig ay kakalat.**

T. Mabubuhay s'yang marangal
at sasagana kailanman.

**Nawa yaong kanyang ngalan ay h'wag nang malimutan,
manatiling laging bantog na katulad nitong araw;
nawa siya ay purihin ng lahat ng mga bansa,
at sa Diyos, silang lahat dumalanging:
“Harinawa pagpalain kaming lahat, tulad niyang pinagpala.”**

T. Mabubuhay s'yang marangal
at sasagana kailanman.

ALELUYA

T. Aleluya! Aleluya!
Karunungan ng Maykapal,
tana'y 'yong pangasiwaan,
halina't kami'y turuan.
T. Aleluya! Aleluya!

MABUTING BALITA

Mateo 1:1-17

Talaan ng mga angkang pinagmulan ni Hesukristo, anak ni David.

✠ Ang simula ng Mabuting Balita ng Panginoon
ayon kay San Mateo

Ito ang lahi ni Hesukristo na mula sa angkan ni David
na mula naman sa lahi ni Abraham.

Si Abraham ang ama ni Isaac;
si Isaac ang ama ni Jacob na ama ni Juda
at ng kanyang mga kapatid.
Naging anak naman ni Juda kay Tamar sina Fares at Zara.
Si Fares ang ama ni Esrom at si Esrom ang ama ni Aram.
Si Aram ang ama ni Aminadab;
si Aminadab ang ama ni Naason na ama naman ni Salmon.
Naging anak ni Salmon kay Rahab si Booz,
at naging anak naman ni Booz kay Ruth si Obed.
Si Obed ang ama ni Jesse na ama ni Haring David.

Naging anak ni David si Solomon sa dating asawa ni Urias.
Si Solomon naman ang ama ni Roboam.
Si Roboam ang ama ni Abias, at si Abias ang ama ni Asa.
Si Asa ang ama ni Josafat,
at si Josafat ang ama ni Joram na siya namang ama ni Ozias.
Itong si Ozias ay ama ni Jotam na ama ni Acaz,
at si Acaz ang ama ni Ezequias.



Si Ezequias ang ama ni Manases,
at si Manases ang ama ni Amos na ama naman ni Josias.
Si Josias ang ama ni Jeconias at ang kanyang mga kapatid.
Panahon noon ng pagkakatapon ng mga Israelita sa Babilonia.

Matapos ang pagkakatapon sa Babilonia,
naging anak ni Joconias si Salatiel na ama ni Zorobabel.
Si Zorobabel ang ama ni Abiud na ama ni Eliaquim,
at si Eliaquim ang ama ni Azor.
Si Azor ang ama ni Sadoc na ama ni Aquim;
itong si Aquim ang ama ni Eliud.
Si Eliud ang ama ni Eleazar;
si Eleazar ang ama ni Matan na ama ni Jacob.
At si Jacob ang ama ni Jose na asawa ni Maria.
Si Maria naman ang ina ni Hesus na tinatawag na Kristo.

Samakatwid, labing-apat ang salinlahi mula kay Abraham
hanggang kay David, labing-apat mula kay David
hanggang sa pagkakatapon ng mga Israelita sa Babilonia,
at labing-apat din mula sa pagkakatapon sa Babilonia
hanggang kay Kristo.

Ang Mabuting Balita ng Panginoon.



PANALANGIN NG BAYAN

**Magpasalamat tayo sa Amang nasa langit
at patuloy nating isuko sa kanya ang ating kinabukasan
sa harap ng mga pagsubok at pagbabago sa ating buhay.
Buong pagtitiwala tayong manalangin:**

T. Panginoon, dinggin mo ang iyong bayan.

**Upang puspusang manghikayat ang Simbahan sa lahat ng tao
para magsisi sa kanilang mga kasalanan
at magbalik-loob sa Diyos,
manalangin tayo sa Panginoon.**

T. Panginoon, dinggin mo ang iyong bayan.

**Upang ang mga pamilyang nag-aalitan
ay makadama ng ligayang dulot ng pagkakasundo
at pagkakaisa ngayong panahon ng Adbiyento,
manalangin tayo sa Panginoon.**

T. Panginoon, dinggin mo ang iyong bayan.

**Upang matagpuan ng mga pamilya ang awa
bilang instrumento ng kanilang pananampalataya
sa pagsagot sa kanilang mga suliranin,
manalangin tayo sa Panginoon.**

T. Panginoon, dinggin mo ang iyong bayan.



Upang ang aming pagdiriwang ng Misa de Gallo
ay mailapit kami sa aming pamayanan at parokya
upang sama-sama kaming lumago
sa pag-ibig sa Diyos at kapwa,
manalangin tayo sa Panginoon.

T. Panginoon, dinggin mo ang iyong bayan.

Ama,
niloob mong isilang ng Birheng Maria
ang iyong Anak na si Hesus.
Nawa'y masundan namin ang kababaangloob ni Kristo
na siyang naghatid ng kaligtasan
at kapatawaran sa aming mga kasalanan.
Ikaw na nabubuhay at naghahari
magpasawalang hanggan. Amen.



PANALANGIN UKOL SA MGA ALAY

Ama naming Lumikha,
ang iyong nagkatawang-taong Anak
ay tumulong nawa sa aming ginagawa
upang siya na iniluwal ni Maria
nang di bumawas kundi lalo pang nagpaganap sa pagkabirhen,
ay magpagindapat na kalugdan mo ang aming paghahain
sa ikapagpapatawad ng mga kasalanan
sapagka't siya ang Panginoong kasama mo
at ng Espiritu Santo magpasawalang hanggan.

PANALANGIN PAGKAPAKINABANG

Ama naming mapagmahal,
sa pagsasalo namin sa banal na pakikinabang
ang iyong kagandahang-loob ay aming hinihiling
upang ang pagpaparangal namin sa Mahal na Birhen
at pagtulad namin sa kanya
ay magpagindapat na aming paglingkuran
ang pagganap sa kaloob mong kaligtasan
sa pamamagitan ni Hesukristo
kasama ng Espiritu Santo magpasawalang hanggan.



IKA-18 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
tampok sa Ebanghelyo ngayon si Jose.
Tinawag siya ng Diyos upang bigyan ng matatag na tahanan
at pangalagaan si Maria at ang Sanggol.
Bagamat nasaktan si Jose
nang malaman ang kalagayan ng kanyang kasintahan,
tinanggap din niya ang kalooban ng Diyos
pagkatapos ipaliwanag sa kanya ng anghel
ang misteryong bumabalot sa paglilihi ni Maria.

Nawa'y maging bukas ang ating mga kalooban,
tulad nina Maria at Jose,
na maging mga instrumento ng Diyos para sa iba
sa kabila ng mga masalimuot na pangyayari
sa ating mga sariling buhay.



PANALANGING PAMBUNGAD

Ama naming makapangyarihan,
niloob mong ang iyong Salita na ibinalita ng anghel
ay maging taong tatoo sa sinapupunan ng Mahal na Birhen.
Ipagkaloob mong kaming sumasampalatayang
siya'y Ina ng Diyos
ay matulungan niyang dumalangin sa iyo
sa pamamagitan ni Hesukristo
kasama ng Espiritu Santo magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Jeremias 23:5-8

Pasisibulin ko mula sa lahi ni David ang isang sangang matuwid.

Pagbasa mula sa aklat ni propeta Jeremias

“Nalalapit na ang araw,” sabi ng Panginoon,
“na pasisibulin ko mula sa lahi ni David
ang isang sangang matuwid,
isang hari na buong karunungan maghahari.
Paiiralin niya sa buong lupain ang batas at katarungan.
Magiging matiwasay ang Juda
sa panahon ng kanyang pamamahala,
at ang Israel ay mapayapang mamumuhay.
Ito ang pangalang itatawag sa kanya:
‘Ang Panginoon ay Matuwid.’”

Sinasabi ng Panginoon,
“Darating nga ang panahon
na ang mga tao’y di na manunumpa nang ganito:
‘Nariya’t buhay ang Panginoong nagpalaya sa Israel
mula sa Egipto.’
Sa halip, sasabihin nila,
‘Saksi ko ang Panginoon na nagpalaya sa mga Israelita
mula sa lupain sa hilaga
at sa lahat ng lupaing pinagtapunan ko sa kanila.
Babalik sila sa sariling lupa at doon muling mamumuhay.’”

Ang Salita ng Diyos.



SALMONG TUGUNAN

Salmo 71:2. 12-13. 18-19

T. Mabubuhay s'yang marangal
at sasagana kailanman.

**Turuan mo yaong haring humatol ng katuwiran,
sa taglay mong katarungan, O Diyos, siya'y bahaginan;
upang siya'y maging tapat mamahala sa 'yong bayan,
at pati sa mahihirap maging tapat siyang tunay.**

T. Mabubuhay s'yang marangal
at sasagana kailanman.

**Kanya namang ililigtas ang sinumang tumatawag,
lalo yaong nalimot nang mga taong mahihirap;
sa ganitong mga tao siya'y lubhang nahahabag;
sa kanila tumutulong, upang sila ay maligtas.**

T. Mabubuhay s'yang marangal
at sasagana kailanman.

**Ang Poong Diyos ng Israel, purihin ng taong madla;
ang kahanga-hangang bagay tanging siya ang may gawa.
Ang dakilang ngalan niya ay purihin kailanman,
at siya ay dakilain nitong buong sanlibutan! Amen! Amen!**

T. Mabubuhay s'yang marangal
at sasagana kailanman.



ALELUYA

T. Aleluya! Aleluya!
Namumuno ng Israel,
nagbigay-utos sa amin,
halina't kami'y sagipin.

T. Aleluya! Aleluya!

MABUTING BALITA

Mateo 1:18-24

Si Hesus ay isinilang ni Maria, na kabiya ng puso ni Jose, na anak ni David.

✠ Ang Mabuting Balita ng Panginoon ayon kay San Mateo

Ganito ang pagkapanganak kay Hesukristo.

Si Maria na kanyang ina
at si Jose na nakatakda nang pakasal.
Ngunit bago sila nakasal,
si Maria'y natagpuang nagdadalang-tao.
Ito'y sa pamamagitan ng Espiritu Santo.
Isang taong matuwid itong si Jose
na kanyang magiging asawa,
ngunit ayaw niyang mapahiya si Maria,
kaya ipinasiya niyang hiwalayan ito nang lihim.

Samantalang iniisip ni Jose ito,
napakita sa kanya sa panaginip
ang isang anghel ng Panginoon.
Sabi nito sa kanya, "Jose, anak ni David,
huwag kang matakot na tuluyang pakasalan si Maria,
sapagkat siya'y naglihi sa pamamagitan ng Espiritu Santo.
Manganganak siya ng isang lalaki
at ito'y pangangalanan mong Hesus,
sapagkat siya ang magliligtas sa kanyang bayan
sa kanilang mga kasalanan."

Nangyari ang lahat ng ito
upang matupad ang sinabi ng Panginoon
sa pamamagitan ng propeta:

“Maglilihi ang isang dalaga
at manganganak ng isang lalaki,
At tatawagin itong “Emmanuel,”
ang kahuluga’y “Kasama natin ang Diyos”.

Nang magising si Jose,
sinunod niya ang utos ng anghel ng Panginoon;
pinakasalan niya si Maria.
Ngunit hindi ginalaw ni Jose si Maria
hanggang sa maipanganak nito ang isang sanggol na lalaki
na pinangalanan niyang Hesus.

Ang Mabuting Balita ng Panginoon.



PANALANGIN NG BAYAN

**Naranasan ng tao ang awa at pag-ibig ng Ama
sa katauhan ni Hesus na Emmanuel,
ang Diyos-nasumasaatin.**

**Buong pagtitiwala nating ilapit sa kanya
ang ating mga pagsusumamo at panalangin.
Ating sambitin:**

T. Panginoon, dinggin mo ang aming panalangin.

**Nawa ang mga pinuno ng Simbahan at ng bayan
ay manatiling matatag at nagtitiwala sa Panginoon
sa kabila ng kahirapan at mga pagsubok,
manalangin tayo sa Panginoon.**

T. Panginoon, dinggin mo ang aming panalangin.

**Nawa ang mga ama ng bawat pamilya
ay maging katulad ni San Jose na matuwid,
nangalaga kay Maria, at naging bukas sa kalooban ng Diyos,
manalangin tayo sa Panginoon.**

T. Panginoon, dinggin mo ang aming panalangin.

**Nawa ang mga kabataan ay matuto
sa halimbawang ipinakita nina Maria at Jose
na kumilala kay Hesus bilang sentro ng kanilang buhay,
manalangin tayo sa Panginoon.**

T. Panginoon, dinggin mo ang aming panalangin.



**Nawa maibsan ang kalungkutan ng mga Pilipinong
malayo sa kanilang tahanan at pamilya ngayong Pasko
sa tulong ng mga panalangin at pagmamahal
ng kanilang mga mahal sa buhay,
manalangin tayo sa Panginoon.**

T. Panginoon, dinggin mo ang aming panalangin.

**Nawa sa pagsapit ng Pasko
ay maranasan namin ang kapayapaan,
pagkandili, at kasiyahan na dulot ni Hesus,
ang aming Manliligtas at Emmanuel,
manalangin tayo sa Panginoon.**

T. Panginoon, dinggin mo ang aming panalangin.

**Ama naming makapangyarihan,
pakinggan mo ang panalangin ng iyong mga lingkod.
Sa aming pag-asa at paghihintay sa pagdating ng iyong Anak,
nawa'y punuin mo kami ng kapayapaan at kasiyahan
sa pamamagitan ni Kristong aming Panginoon. Amen.**



PANALANGIN UKOL SA MGA ALAY

Ama naming Lumikha,
ang mga alay naming nakahain sa iyong dambana
ay pabanalin nawa ng paglukob ng Banal na Espiritu
na pumuspos sa sinapupunan ng Mahal na Birheng Maria
upang magdalang-tao at magsilang sa iyong Anak
na siyang namamagitan magpasawalang hanggan.

PANALANGIN PAGKAPAKINABANG

Ama naming mapagmahal,
sa aming pagsasalo sa banal na hain
lagi nawa naming madama
ang iyong kagandahang-loob
upang kami'y magkamit ng kaligtasan
pakundangan sa pagkakatawang-tao ng iyong Anak
ngayong aming ginugunita ang kanyang Ina
sa pamamagitan din ni Hesukristo
kasama ng Espiritu Santo magpasawalang hanggan.



IKA-19 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
ang paglilihi kay Juan Bautista
ay isang pagpapakita ng kagandahang-loob ng Diyos.
Si Juan ang maghahanda sa daraanan ng Panginoon.
Mapupuno tayo ng tuwa at galak
dahil ang ating kaligtasan ay nalalapit na!

Sa pagpapatuloy ng ating pagdiriwang,
hilingin natin na maitulad natin
ang ating mga kalooban ayon sa kalooban ng Diyos
kasama ni Maria na ating Ina.



PANALANGING PAMBUNGAD

Ama naming makapangyarihan,
minarapat mong mahayag ang iyong kadakilaan
sa pagsilang ng Mahal na Birhen para sa sanlibutan.
Ang dakilang misteryong ito
ng pagkakatawang-tao ng Anak mo
ay mapag-ukulan nawa namin ng lubos na pananalig
at maipagdiwang namin nang may di magmamaliw na pag-ibig
sa pamamagitan niya kasama ng Espiritu Santo
magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Mga Hukom 13:2-7. 24-25

Ang panganganak kay Samson ay ibinalita ng anghel.

Pagbasa mula sa aklat ng Mga Hukom

Noong mga araw na iyon, sa bayan ng Zora
ay may isang lalaking Manoa ang pangalan,
kabilang sa lipi ni Dan.

Ang asawa niya ay hindi magkaanak.

Minsan, napakita sa babae ang anghel ng Panginoon,
at sinabi, “Hanggang ngayo’y wala kang anak.

Ngunit hindi magtatagal, maglilihi ka at manganganak.

Mula ngayon ay huwag kang iinom ng anumang uri ng alak
ni titikim ng anumang bawal na pagkain.

Kung maipanganak mo na siya,

huwag mong papuputulan ng buhok
pagkat mula pa sa kanyang pagsilang
ay itatalaga na siya sa Diyos.

Siya ang magsisimulang magligtas sa Israel
mula sa mga Filisteo.”

Ang babae’y lumapit sa kanyang asawa at kanyang sinabi,
“Napakita sa akin ang isang propeta ng Diyos, parang anghel.
Kinikilabutan ako!

Hindi ko tinanong kung tagasaan siya
at hindi naman niya sinabi kung sino siya.

Huwag daw akong iinom ng alak
ni titikim ng anumang bawal na pagkain
pagkat ang sanggol na isisilang ko’y itatalaga sa Diyos.”



Dumating ang araw at nanganak ang asawa ni Manoa.
Lalaki ang sanggol at pinangalanan nilang Samson.
Lumaki ang bata na patuloy na pinagpapala ng Panginoon.
Ang Espiritu ng Panginoon ay lumukob kay Samson.

Ang Salita ng Diyos.



SALMONG TUGUNAN

Salmo 70:3-4. 5-6. 16-17

T. Lagi kong papupurihan
ang iyong kapangyarihan.

**Ikaw nawa ang muog ko at ligtas na kakanlungan,
matatag na kublihan ko at matibay na sanggalang.
Sa lahat ng masasama, O Diyos, ako'y ipaglaban.**

T. Lagi kong papupurihan
ang iyong kapangyarihan.

**Panginoon, sa iyo ko inilagak ang pagasa,
maliit pang bata ako, sa iyo'y may tiwala na;
sa simula at mula pa wala akong inasahang
mag-iingat sa sarili, kundi tanging ikaw lamang.**

T. Lagi kong papupurihan
ang iyong kapangyarihan.

**Pagkat ikaw, Panginoon, ay malakas at dakila,
ang taglay mong katangia'y ihahayag ko sa madla.
Sapul pa sa pagkabata ako'y iyong tinuruan,
hanggang ngayo'y sinasambit ang gawa mong hinangaan.**

T. Lagi kong papupurihan
ang iyong kapangyarihan.



ALELUYA

T. Aleluya! Aleluya!
Sanga kang ugat ni Jesse,
taga-akay ng marami,
halina't tubusin kami.

T. Aleluya! Aleluya!

MABUTING BALITA

Lucas 1:5-25

Ang panganganak kay Juan Bautista ay ibinalita ni anghel Gabriel.

✠ Ang Mabuting Balita ng Panginoon ayon kay San Lucas

Noong si Herodes ang hari ng Judea,
may isang saserdote na ang ngala'y Zacarias,
sa pangkat ni Abias.

At mula rin sa lipi ni Aaron

ang kanyang asawang si Elisabet.

Kapwa sila kalugud-lugod sa paningin ng Diyos,

namumuhay nang ayon sa mga utos

at tuntuning mula sa Panginoon.

Wala silang anak sapagkat baog si Elisabet,

at sila'y matanda na.

Ang pangkat ni Zacarias ang nanunungkulan noon,

at siya'y naglilingkod sa harapan ng Diyos bilang saserdote.

Nang sila'y magsapalaran,

ayon sa kaugalian ng mga saserdote,

siya ang nahirang na maghandog ng kamanyang.

Kaya't pumasok siya sa templo ng Panginoon

sa oras ng pagsusunog ng kamanyang,

samantalang nagkakatipon sa labas

ang mga tao at nananalangin.

Walang anu-ano'y napakita sa kanya
ang isang anghel ng Panginoon,
nakatayo sa gawing kanan
ng dambanang sunugan ng kamanyang.
Nagulat si Zacarias at sinidlan ng matinding takot
nang makita ang anghel.
Ngunit sinabi nito sa kanya,
“Huwag kang matakot, Zacarias!
Dininig ng Diyos ang panalangin mo.
Kayo ni Elisabet ay magkakaanak ng isang lalaki,
at Juan ang ipangangalan mo sa kanya.
Ikaw ay matutuwa at magiging maligaya,
at marami ang magagalak sa kanyang pagsilang
sapagkat siya'y magiging dakila sa paningin ng Panginoon.
Hindi siya iinom ng alak o anumang inuming nakalalasing.
Sa sinapupunan pa lamang ng kanyang ina,
mapupuspos na siya ng Espiritu Santo.
Marami sa mga anak ng Israel ang panunumbalikin niya
sa kanilang Panginoong Diyos.
Mauuna siya sa Panginoon,
taglay ang espiritu at kapangyarihan ni Elias,
upang pagkasunduin ang mga ama at ang mga anak,
at panumbalikin sa daan ng matuwid ang mga suwail.
Sa gayon, ipaghahanda niya ng isang bayan ang Panginoon.”

Sinabi ni Zacarias sa anghel,
“Paano ko po matitiyak na mangyayari ito?
Sapagkat ako'y napakatanda na
at gayon din ang aking asawa.”
Sumagot ang anghel,
“Ako si Gabriel na naglilingkod sa harapan ng Diyos.
Sinugo ako upang ihatid sa iyo
ang mabuting balitang sinabi ko na sa iyo.



At ngayon, mabibingi ka't hindi makapagsasalita
hanggang sa araw na maganap ang mga bagay na ito,
sapagkat hindi ka naniwala sa mga sinabi ko
na matutupad pagdating ng takdang panahon."

Samantala, naghihintay naman kay Zacarias ang mga tao.
Nagtaka sila kung bakit nagtagal siya nang gayon
sa loob ng templo.

Paglabas niya ay hindi na siya makapagsalita,
mga senyas na lamang ang ginagamit niya;
kaya natanto nila na nakakita siya ng pangitain.
At siya'y nanatiling pipi.

Nang matapos ang panahon ng kanyang paglilingkod
ay umuwi na siya.

Hindi nga nagtagal at naglihi si Elisabet,
at hindi ito umalis ng bahay sa loob ng limang buwan.
"Ngayo'y nilingap ako ng Panginoon," wika ni Elisabet.
"Ginawa niya ito upang alisin ang aking kadustaan
sa harapan ng mga tao!"

Ang Mabuting Balita ng Panginoon.



PANALANGIN NG BAYAN

Hindi matatawaran ang kagandahang-loob ng Diyos.
Ibibigay niya sa atin ang lahat
ng ating mga pangangailangan sa takdang panahon.
Buong tiwala tayong dumalangin sa kanya:

T. Panginoon, dinggin mo ang aming panalangin.

Nawa'y maging bukas at handa kami
sa kapanganakan ng Tagapagligtas ngayong Pasko
at sa pakikitagpo namin sa kanya
sa bawat araw ng aming buhay,
manalangin tayo sa Panginoon.

T. Panginoon, dinggin mo ang aming panalangin.

Nawa'y dumami pa ang mga mabubuting taong
tumutulong at nagsusumikap para sa ikabubuti
at ikauunlad ng mga pamilya
sa pamamagitan ng kanilang mga gawa
at halimbawang nakaugat sa turo ng Diyos,
manalangin tayo sa Panginoon.

T. Panginoon, dinggin mo ang aming panalangin.

Nawa'y tanggapin ng mga magulang ang mga anak
na biyaya ng Panginoon at tulungan silang tukuyin
ang kalooban ng Diyos sa kanilang buhay,
manalangin tayo sa Panginoon.

T. Panginoon, dinggin mo ang aming panalangin.



**Tulad nina Zacarias at Elisabet,
nawa'y pagpalain ng Panginoon
ang mga mag-asawang naghihintay ng anak
na aarugain at mamahalin,
manalangin tayo sa Panginoon.**

T. Panginoon, dinggin mo ang aming panalangin.

**Panginoon,
puspusin mo kami ng iyong Espiritu
upang buong galak naming tanggapin si Hesus
at kami nawa'y maging tapat lagi sa iyo,
ngayon at magpasawalang hanggan. Amen.**



PANALANGIN UKOL SA MGA ALAY

Ama naming Lumikha,
tunghayan mo ang mga nakahain sa dambana.
Itong aming abang nakayanan
ay magkamit nawa ng kapupunang kabanalan
na idinudulot ng iyong kapangyarihan
sa pamamagitan ni Hesukristo
kasama ng Espiritu Santo magpasawalang hanggan.

PANALANGIN PAGKAPAKINABANG

Ama naming mapagmahal,
bilang pagtanaw ng utang na loob
sa aming pinagsaluhan
kami ay panatilihin mong nananabik
sa mga darating mong bigay
upang mapaghandaan naming tanggapin nang marangal
ang pagsilang ng aming Manunubos na mahal
na siyang namamagitan kasama ng Espiritu Santo
magpasawalang hanggan.



IKA-20 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
ang Misa sa araw na ito
ay tinatawag ding *Misa Aurea* o “Ginintuang Misa.”
Ipinagdiriwang ang *Misa Aurea* noon
nang may malaking kapistahan;
nakasulat sa ginto ang malalaking titik
ng ebanghelyong babasahin sa aklat,
at maliwanag ang mga kandila sa buong Misa.
Ang kapistahan, mga titik na ginto,
at ang liwanag ng mga kandila
ay mga pagpapahayag ng dakilang biyayang idinulot
ng mga salita ng Anghel Gabriel at sa tugon ni Maria.
Maririnig natin ngayon
ang ikatlo at huling pagpapahayag ng anghel
tungkol sa katuparan ng mga pangako ng Diyos.



PANALANGING PAMBUNGAD

Ama naming makapangyarihan,
ang iyong Salitang nananahan sa iyong kaibuturan
ay dinala sa sinapupunan ng Birheng kalinis-linisan
noong tanggapin niya ang Mabuting Balitang hatid ng anghel
at siya'y lukuban ng Espiritu Santo bilang iyong tahanan.
Katulad ng Mahal na Birhen,
matanggap nawa naming mapagpakumbaba
na sundin ang loob mo
sa pamamagitan ni Hesukristo
kasama ng Espiritu Santo magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Isaias 7:10-14
Maglilihi ang isang dalaga.

Pagbasa mula sa aklat ni propeta Isaias

Noong mga araw na iyon,
ipinasabi ng Panginoon kay Acaz:
“Humingi ka sa akin ng palatandaan,
maging sa kalaliman ng kinaroroonan ng Sheol
o sa kaitaasan ng langit.”

Sumagot si Acaz:

“Hindi po ako hihingi.

Hindi ko susubukin ang Panginoon.”

Sinabi ni Isaias:

“Pakinggan mo, sambahayan ni David,
kulang pa ba ang galitin ninyo ang mga tao
na pati ang aking Diyos ay inyong niyayamot?

Kaya nga’t ang Panginoon na rin
ang magbibigay ng palatandaan:
maglilihi ang isang dalaga
at manganganak ng lalaki
at ito’y tatawaging Emmanuel.”

Ang Salita ng Diyos.



SALMONG TUGUNAN

Salmo 23:1-2. 3-4. 5-6

T. Ang Panginoo'y darating,
s'ya'y dakilang Hari natin.

**Ang buong daigdig, lahat ng naroon,
may-ari'y ang Diyos, ating Panginoon;
ang mundo'y natayo at yaong sandiga'y
ilalim ng lupa, tubig kalaliman.**

T. Ang Panginoo'y darating,
s'ya'y dakilang Hari natin.

**Sino ang marapat umahon sa burol,
sa burol ng Poon, sino ngang aahon?
Sino'ng papayagang pumasok sa templo,
Sino'ng tutulutang pumasok na tao?
Siya, na malinis ang isip at buhay,
na hindi sumamba sa diyus-diyusan;
tapat sa pangako na binibitiwan.**

T. Ang Panginoo'y darating,
s'ya'y dakilang Hari natin.

**Ang Panginoong Diyos, pagpapalain siya,
ililigtas siya't pawawalang-sala.
Gayon ang sinumang lumalapit sa Diyos
silang lumalapit sa Diyos ni Jacob.**

T. Ang Panginoo'y darating,
s'ya'y dakilang Hari natin.



ALELUYA

T. Aleluya! Aleluya!
Halina, Susi ni David,
binubuksan mo ang langit
upang kami ay masagip.
T. Aleluya! Aleluya!

MABUTING BALITA

Lucas 1:26-38

Ikaw ay maglilihi at manganganak ng isang lalaki.

✠ Ang Mabuting Balita ng Panginoon ayon kay San Lucas

Nang ikaanim na buwan na
ng pagdadalantao ni Elisabet,
ang anghel Gabriel ay sinugo ng Diyos sa Nazaret, Galilea,
sa isang dalaga na ang pangala'y Maria.
Siya'y nakatakhang ikasal kay Jose,
isang lalaki buhat sa lipi ni Haring David.
Paglapit ng anghel sa kinaroroonan ng dalaga, binati niya ito.
“Matuwa ka! Ikaw ay kalugod-lugod sa Diyos,” wika niya.
“Sumasaiyo ang Panginoon.”
Nagulumihanan si Maria sa gayong pangungusap,
at inisip niyang mabuti kung ano ang kahulugan niyon.
Kaya't sinabi sa kanya ng anghel,
“Huwag kang matakot, Maria,
sapagkat kinalulugdan ka ng Diyos.
Makinig ka!
Ikaw ay maglilihi at manganganak ng isang lalaki,
at siya'y tatawagin mong Hesus.
Magiging dakila siya,
at tatawaging Anak ng Kataas-taasan.
Ibibigay sa kanya ng Panginoong Diyos
ang trono ng kanyang amang si David.
Maghahari siya sa angkan ni Jacob magpakailanman,
at ang kanyang paghahari ay walang hanggan.”

“Paanong mangyayari ito,
gayong ako’y dalaga?” tanong ni Maria.
Sumagot ang anghel,
“Bababa sa iyo ang Espiritu Santo,
at lililiman ka ng kapangyarihan ng Kataas-taasan.
Kaya’t banal ang ipanganganak mo
at tatawaging Anak ng Diyos.
Natatandaan mo ang iyong kamag-anak na si Elisabet?
Alam ng lahat na siya’y baog,
ngunit naglihi siya sa kabila ng kanyang katandaan.
At ngayo’y ikaanim na buwan na ng kanyang pagdadalantao
— sapagkat walang hindi mapangyayari ang Diyos.”

Sumagot si Maria,
“Ako’y alipin ng Panginoon.
Mangyari sa akin ang iyong sinabi.”
At nilisan siya ng anghel.

Ang Mabuting Balita ng Panginoon.



PANALANGIN NG BAYAN

**Manalangin tayo sa Diyos upang tulad ni Maria,
buong puso rin tayong magtiwala at tumalima sa Diyos.
Ating sambitin:**

T. Ama namin, dinggin mo kami.

**Tulad ng Anghel Gabriel,
magpatuloy nawa ang Simbahan
sa masigasig na paghahatid
ng Mabuting Balita ng kaligtasang hatid
ng Sanggol na Emmanuel,
manalangin tayo sa Panginoon.**

T. Ama namin, dinggin mo kami.

**Gabayan nawa ng Espiritu Santo
ang mga pinuno ng ating pamahalaan
upang lagi nilang maalala
na sila'y mga lingkod ng Diyos at ng bayan,
manalangin tayo sa Panginoon.**

T. Ama namin, dinggin mo kami.

**Patatagin at gabayan nawa ng Espiritu Santo
ang mga mag-anak
na 'di magkakasama-sama ngayong Pasko
lalo na ang mga pamilya ng mga migrante
at mga lingkod-bayan,
manalangin tayo sa Panginoon.**

T. Ama namin, dinggin mo kami.



**Tularan nawa ng mga kabataan si Maria
na may matibay na pananampalataya sa Diyos,
kababaang-loob, at malasakit sa kapwa tao,
manalangin tayo sa Panginoon.**

T. Ama namin, dinggin mo kami.

**Ama,
nagkatawang-tao ang iyong Anak
nang inialay ni Maria ang kanyang buhay
bilang iyong lingkod.
Tularan nawa namin ang halimbawa ng Mahal na Ina
habang naghahanda kami sa pagdating
ni Hesukristong aming Panginoon. Amen.**



PANALANGIN UKOL SA MGA ALAY

Ama naming Lumikha,
itangi mo ang paghahaing ito
upang ang mga nagdiriwang ay magkasalu-salo
sa sinasampalatayang dapat na asahan
sa darating mong Anak na aming hinihintay
sapagka't siya ang namamagitan
kasama ng Espiritu Santo magpasawalang hanggan.

PANALANGIN PAGKAPAKINABANG

Ama naming mapagmahal,
ang mga pinapagsalu-salo mo sa iyong banal na piging
ay papagkamtin mo ng tunay na kapayapaan
bilang kapakinabangan sa ginanap na pagdiriwang
sa pamamagitan ni Hesukristo
kasama ng Espiritu Santo magpasawalang hanggan.



IKA-21 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
Dama ni Maria ang kalooban ng Diyos
kaya nagmadali siyang umalis para dalawin si Elisabet.
Ibig din ni Maria na maibahagi
ang kahanga-hangang biyaya ng Diyos sa kanyang buhay
at ang Mabuting Balitang taglay niya
sa kanyang sinapupunan.
Ang pagtatagpo ng dalawang ina
ay naging isang masayang himig ng papuri sa Diyos.

Sa pagpapatuloy ng ating pagdiriwang,
hilingin natin na maitulad natin
ang ating mga kalooban ayon sa kalooban ng Diyos
kasama ni Maria na ating Ina.



PANALANGING PAMBUNGAD

Ama naming makapangyarihan,
niloob mong ang iyong Salita na ibinalita ng anghel
ay maging taong tatoo sa sinapupunan ng Mahal na Birhen.
Ipagkaloob mong kaming sumasampalatayang
siya'y Ina ng Diyos
ay matulungan niyang dumalangin sa iyo
sa pamamagitan ni Hesukristo
kasama ng Espiritu Santo magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Awit 2:8-14

Mga gulod tinatahak upang ako'y makaniig
ng sinta kong minamahal at tapat kong mangingibig.

Pagbasa mula sa aklat ng Awit ni Solomon

Ang tinig ng aking mahal ay akin nang naririnig,
mga gulod, tinatahak upang ako'y makaniig.
Itong aking mangingibig ay katulad niyong usa,
mabilis kung kumilos, ang katawan ay masigla.
Sa tabi ng aming pader, naroroon lagi siya,
sumisilip sa bintana para ako ay makita.
Ang mahal ko ay nangusap at ganito ang tinuran:
“Sa akin ay sumama ka, halika na, aking mahal.
Lumipas na ang taglamig sa buong lupain
at ang tag-ulan ay natapos na rin.
Bulaklak sa kaparangan tingna't namumukadkad na,
ito na nga ang panahon upang tayo ay magsaya,
sa bukid, ang mga ibo'y humuhuni, kumakanta.
Yaong mga bungang igos ay hinog nang para-para,
at ang mga punong ubas, sa bulaklak ay hitik na.
Tayo na nga aking mahal, sa akin ay sumama ka.
Ika'y parang kalapati, nagkukubli sa batuhan,
halika at ang ganda mo ay nais kong mapagmasdan,
at nang akin ding marinig ang tinig mong ginintuan.

Ang Salita ng Diyos.



o kaya:

Sofonias 3:14-18

Nasa kalagitnaan mo ang Hari ng Israel, ang Panginoon.

Pagbasa mula sa aklat ni propeta Sofonias

Umawit ka nang malakas, Lungsod ng Sion;
sumigaw ka, Israel!
Magalak ka nang lubusan, Lungsod ng Jerusalem!
Ang mga nagpaparusa sa iyo ay inalis na ng Panginoon,
at itinaon niya ang inyong mga kaaway.
Nasa kalagitnaan mo ang Hari ng Israel, ang Panginoon;
wala nang kasawiang dapat pang katakutan.
Sa araw na yaon ay sasabihin sa Jerusalem:
“Huwag kang matakot, Sion;
huwag manghina ang iyong loob.
Nasa piling mo ang Panginoong iyong Diyos,
parang bayaning nagtagumpay;
makikigalak siya sa iyong katuwaan,
babaguhin ka ng kanyang pag-ibig;
at siya’y masayang aawit sa laki ng kagalakan,
gaya ng nagdiriwang sa pista.”

Ang Salita ng Diyos.



SALMONG TUGUNAN

Salmo 32:2-3. 11-12. 20-21

T. Panginoo'y papurihan
ng tapat n'yang sambayanan.

**Ang Panginoong Diyos ay pasalamatan,
tugtugin ang alpa't awit ay saliwang.
Isang bagong awit, awiting malakas,
kasaliw ang tugtog ng alpang marilag!**

T. Panginoo'y papurihan
ng tapat n'yang sambayanan.

**Ngunit ang mga panukala ng Diyos,
ay mamamalagi't walang pagkatapos.
Mapalad ang bansang Panginoo'y Diyos,
mapalad ang bayang kanyang ibinukod.**

T. Panginoo'y papurihan
ng tapat n'yang sambayanan.

**Ang ating pag-asa'y nasa Panginoon;
siya ang sanggalang natin at katulong.
Dahilan sa kanya, kami'y natutuwa,
sa kanyang ngalan ay nagtitiwala.**

T. Panginoo'y papurihan
ng tapat n'yang sambayanan.



ALELUYA

T. Aleluya! Aleluya!
Emman'wel na hari namin
halina't kami'y sagipin
at utos mo'y tutuparin.
T. Aleluya! Aleluya!

MABUTING BALITA

Lucas 1:39-45

Sino ako upang dalawin ng ina ng aking Panginoon?

✠ Ang Mabuting Balita ng Panginoon ayon kay San Lucas

Si Maria'y nagmamadaling pumunta
sa isang bayan sa kaburulan ng Judea.
Pagdating sa bahay ni Zacarias,
binati niya si Elisabet.
Nang marinig ni Elisabet ang bati ni Maria,
naggagalaw ang sanggol sa kanyang tiyan.
Napuspos ng Espiritu Santo si Elisabet,
at buong galak niyang sinabi,
“Bukod kang pinagpala sa babaing lahat
at pinagpala naman ang iyong dinadalang anak!
Sino ako upang dalawin ng ina ng aking Panginoon?
Sapagkat pagkarinig ko ng iyong bati
ay naggagalaw sa tuwa ang sanggol sa aking tiyan.
Mapalad ka sapagkat nanalig kang matutupad
ang ipinasabi sa iyo ng Panginoon!”

Ang Mabuting Balita ng Panginoon.



PANALANGIN NG BAYAN

**Purihin natin ang Poon
na siyang humirang sa Birheng Maria
na maging Ina ng ating Tagapagligtas.
Idalangin natin:**

T. Panginoon, dinggin mo ang iyong sambayanan.

**Magbunga nawa ang aming pagdedebosyon
sa kamahalmahalang puso ni Hesus
at kalinis-linisang puso ni Maria
tungo sa tunay na pagmamalasakit sa ating kapwa,
manalangin tayo sa Panginoon.**

T. Panginoon, dinggin mo ang iyong sambayanan.

**Mapuspos nawa ng Espiritung Banal
ang mga pinuno ng aming Pamahalaan
nang sa gayo'y manguna sila sa pag-ugit
ng pagbangon ng aming bansa,
manalangin tayo sa Panginoon.**

T. Panginoon, dinggin mo ang iyong sambayanan.

**Nawa'y maging tagapagpalaganap ng pag-ibig at kabanalan
ang mga magulang sa bawat pamilya.
Nawa ang mga nakatatanda ay maging mga mabubuting gabay
at tagapagpayo sa mga kabataan,
manalangin tayo sa Panginoon.**

T. Panginoon, dinggin mo ang iyong sambayanan.



Nawa kami'y maging bukas-palad na pamayanan
na nagbabahagi ng talino, oras, at pag-ibig sa kapwa
bilang tanda ng aming pasasalamat
sa lahat ng biyaya ng Panginoon,
manalangin tayo sa Panginoon.

T. Panginoon, dinggin mo ang iyong sambayanan.

Ama naming mapagmahal,
ipagkaloob mo ang aming mga kahilingan.
Maipagdiwang nawa namin nang may galak
ang pagsilang ng iyong Dakilang Anak.
Hinihiling namin ito sa ngalan
ni Hesukristong aming Panginoon. Amen.



PANALANGIN UKOL SA MGA ALAY

Ama naming Lumikha,
ang mga alay naming nakahain sa iyong dambana
ay pabanalin nawa ng paglukob ng Banal na Espiritu
na pumuspos sa sinapupunan ng Mahal na Birheng Maria
upang magdalang-tao at magsilang sa iyong Anak
na siyang namamagitan magpasawalang hanggan.

PANALANGIN PAGKAPAKINABANG

Ama naming mapagmahal,
sa aming pagsasalo sa banal na hain
lagi nawa naming madama
ang iyong kagandahang-loob
upang kami'y magkamit ng kaligtasan
pakundangan sa pagkakatawang-tao ng iyong Anak
ngayong aming ginugunita ang kanyang Ina
sa pamamagitan din ni Hesukristo
kasama ng Espiritu Santo magpasawalang hanggan.



IKA-22 NG DISYEMBRE

IKAAPAT NA LINGGO SA PANAHON NG PAGDATING NG PANGINOON

Ang pari o ang diyakono o sinumang angkop na tagapaglingkod ay makapagbibigay ng maikling paliwag tungkol sa buod ng Misang ipagdiriwang.

Mga minamahal na kapatid,
pinagpala si Maria at si Elisabet
dahil sa kanilang kagandahang-loob
sa pagtugon sa tawag ng Diyos.
Habang papalapit na tayo
sa pagdiriwang ng Pasko ng Pagsilang,
pagkalooban din nawa tayo ng Diyos ng lakas ng loob
na tumugon sa kanyang paanyaya.
Dahil sa kanyang pagiging bukas sa mga pangako ng Diyos
at matatag na pananampalataya,
naging dakilang huwaran si Maria
sa paghahanda sa pagtanggap sa Manunubos.



PANALANGING PAMBUNGAD

Ama naming makapangyarihan,
kasihan mo kami ng iyong pagmamahal
upang kaming nakabatid sa pagbabalita ng anghel
tungkol sa pagkakatawang-tao ng Anak mo
ay makapakinabang sa kanyang pagpapakasakit
at pagkamatay sa krus sa pagsapit namin
sa pagkabuhay niya sa langit
sa pamamagitan niya kasama ng Espiritu Santo
magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Mikas 5, 1-4a

Magmumula sa Betlehem ang maghahari sa Israel.

Pagbasa mula sa aklat ni propeta Mikas

Ito ang sinasabi ng Panginoon:

Betlehem Efrata, bagamat pinakamaliit ka
sa mga angkan ni Juda
ay sa iyo magmumula ang isang maghahari sa Israel.
Ang pinagmula'y buhat pa nang una,
mula pa noong unang panahon.
Kaya nga, ang bayan ng Panginoon
ay ibibigay niya sa kamay ng mga kaaway
hanggang sa isilang ng babae ang sanggol na maghahari.
Pagkatapos, babalik sa Israel ang nalabi sa bansang ito.
Pagdating ng haring yaon,
pamamahalaan niya ang Israel
sa pamamagitan ng kapangyarihan ng Panginoon;
taglay niya ang kadakilaan ng pangalan ng Panginoon
na kanyang Diyos.
At ang Israel ay mamumuhay na ligtas,
sapagkat ang haring yaon
ay kikilalanin ng buong sanlibutan.
Sa kanya magmumula ang kapayapaan natin.

Ang Salita ng Diyos.



SALMONG TUGUNAN

Salmo 79, 2ak at 3b. 15-16. 18-19

T. Akitin mo, Poong mahal,
iligtas kami't tanglawan.

**Pastol ng Israel, kami ay pakinggan;
mula sa trono mong may mga kerubin, kami ay tulungan.
Sa taglay mong takas, kami ay iligtas, at tubusin sa hiras!**

T. Akitin mo, Poong mahal,
iligtas kami't tanglawan.

**Ika'y manumbalik,
O Diyos na Dakila! Pagmasdan mo kami mula sa itaas,
at ang punong ito'y muling pagyamanin, at iyong iligtas.
Lumapit ka sana,
ang puno ng ubas na itinanim mo ay iyong iligtas,
yaong punong iyon na pinalago mo't iyong pinalakas!**

T. Akitin mo, Poong mahal,
iligtas kami't tanglawan.

**Ang lingkod mong mahal
ay iyong ingatan, yamang hinirang mo
ay iyong ipagsanggalang,
iyong palakasin bilang isang bansang makapangyarihan!
At kung magkagayon,
magbabalik kami't di na magtataksil sa 'yo kailanman,
kami'y pasiglahi't aming pupurihin ang iyong pangalan.**

T. Akitin mo, Poong mahal,
iligtas kami't tanglawan.



IKALAWANG PAGBASA

Hebreo 10, 5-10

Narito ako upang tuparin ang iyong kalooban.

Pagbasa mula sa sulat sa mga Hebreo

Noong si Kristo'y manaog sa sanlibutan,
sinabi niya sa Diyos,

“Ang mga hain at handog na mga hayop ay hindi mo ibig,
Kaya't inihanda mo ang aking katawan upang maging hain.
Hindi mo kinalugdan ang mga handog
na susunugin at ang mga handog dahil sa kasalanan.
Kaya't aking sinabi, ‘Narito ako, O Diyos,
upang tupdin ang iyong kalooban’
Ayon sa nasusulat sa Kasulatan tungkol sa akin.”

Sinabi muna niya, “Hindi mo inibig o kinalugdan
ang mga hain at handog na mga hayop,
mga handog na susunugin
at mga handog dahil sa kasalanan” –
bagamat ito'y inihahandog ayon sa Kautusan.

Saka niya sinabi,

“Narito ako upang tupdin ang iyong kalooban.”

Inalis ng Diyos ang unang handog
at pinalitan ng handog ni Kristo.

At dahil sa kanyang pagsunod sa kalooban ng Diyos,
nilinis tayo ni Hesukristo sa ating mga kasalanan
sa pamamagitan ng minsang paghahandog ng kanyang sarili
at iyo'y sapat na.

Ang Salita ng Diyos.



ALELUYA

Lucas 1:38

T. Aleluya! Aleluya!
Narito ang lingkod ng D'yos
maganap nawa nang lubos
ang salita mong kaloob.
T. Aleluya! Aleluya!

MABUTING BALITA

Lucas 1, 39-45

Sino ako upang dalawin ng ina ng aking Panginoon.

✠ Ang Mabuting Balita ng Panginoon ayon kay San Lucas

Hindi nagtagal at si Maria'y nagmamadaling pumunta
sa isang bayan sa kaburulan ng Juda.
Pagdating sa bahay ni Zacarias,
binati niya si Elisabet.
Nang marinig ni Elisabet ang bati ni Maria,
naggagalaw ang sanggol sa kanyang tiyan.
Napuspos ng Espiritu Santo si Elisabet,
at buong galak niyang sinabi,
“Pinagpala ka sa mga babae,
at pinagpala rin ang dinadala mo sa iyong sinapupunan!
Sino ako upang dalawin ng ina ng aking Panginoon?
Sapagkat pagkarinig ko ng iyong bati
ay naggagalaw sa tuwa ang sanggol sa aking tiyan.
Mapalad ka sapagkat nanalig kang matutupad
ang ipinasabi sa iyo ng Panginoon!”

Ang Mabuting Balita ng Panginoon.



PANALANGIN NG BAYAN

**Ipanalangin natin sa Ama na tulad nina Maria at Elisabet,
buong galak at kababaang-loob
nawa nating tanggapin ang Manunubos
at buksan ang ating puso sa kanyang Salitang
nagdudulot ng kaligtasan. Ating sabihin:**

T. Panginoon, dinggin mo kami.

**Maging tagapagdala rin nawa ang Simbahan
ng kagalakan sa sangkatauhan—sa mga nagdadalamhati,
maysakit, mga matatanda, at mga maykapansanan,
manalangin tayo sa Panginoon.**

T. Panginoon, dinggin mo kami.

**Maging mulat nawa ang mga pinuno ng bayan
sa pangangailangan ng lahat para sa makatarungan,
at mapagmalasakit na pamahalaan,
manalangin tayo sa Panginoon.**

T. Panginoon, dinggin mo kami.

**Igalang nawa natin ang mga karapatan
ng mga sanggol sa sinapupunan,
at maging mulat tayo sa pangangailangan
ng mga nagdadalanta,
at magbigay ng pag-asa sa kabataang Pilipino,
manalangin tayo sa Panginoon.**

T. Panginoon, dinggin mo kami.



**Magkaisa nawa ang mga pamilya at magkakaibigan
at kalingain ang isa't isa,
at maging bukas sila sa pag-unawa at pagpapatawad,
manalangin tayo sa Panginoon.**

T. Panginoon, dinggin mo kami.

**Patuluyin nawa ng Panginoon ang lahat ng mga pumanaw
sa kaluwalhatian ng kalangitan,
manalangin tayo sa Panginoon.**

T. Panginoon, dinggin mo kami.

**Ama namin,
halina't dinggin at palakasin mo ang iyong bayan
upang, tulad ni Maria, mapuspos kami ng bagong buhay,
kagalakan, at lakas sa maluwalhating pagdating
ng iyong minamahal na Anak
na nabubuhay at naghahari kasama mo
magpasawalang hanggan. Amen.**



PANALANGIN UKOL SA MGA ALAY

Ama naming Lumikha,
ang mga alay naming nakahain sa iyong dambana
ay pabanalin nawa ng paglukob ng Banal na Espiritu
na pumuspos sa sinapupunan ng Mahal na Birheng Maria
upang magdalang-tao at magsilang sa iyong Anak
na siyang namamagitan magpasawalang hanggan.

PANALANGIN PAGKAPAKINABANG

Ama naming mapagmahal,
amin nang pinagsaluhan
ang piging na nagbigay-buhay.
Habang papalapit ang dakilang kapistahan ng pasko,
lalo nawa kaming makinabang nang may pananabik
sa pagiging marapat sa pagdiriwang
sa pagsilang ng Anak mo
na siyang namamagitan magpasawalang hanggan.



IKA-23 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
habang papalapit tayo sa pagdiriwang
ng kaarawan ng Tagapagligtas,
makita nawa natin ang kagandahang-loob ng Diyos
sa ating buhay.
Madama nawa nating tayo rin
ay mahalaga para sa Diyos—tulad ni Juan
na magiging Tagapagpakilala kay Hesus.
Maging tayo man
ay mayroong natatanging misyon sa buhay:
ang tanggapin ang Panginoon
at ipamalita sa iba ang kanyang kagandahang-loob.



PANALANGING PAMBUNGAD

Ama naming makapangyarihan,
ngayong malapit na ang Pasko ng Pagsilang
ng iyong Anak
kaming mga lingkod mong hindi karapat-dapat
ay tangkilikin nawa sa pag-ibig ng iyong Salita
na nagkatawang-tao sa sinapupunan ng Mahal na Birhen
at nanahan sa aming piling
kasama mo at ng Espiritu Santo
magpasawalang hanggan.



PAGPAPAHAYAG NG SALITA NG DIYOS

UNANG PAGBASA

Malakias 3:1-4. 23-24
Bago dumating ang araw ng Panginoon,
isusugo ko sa inyo si propeta Elias.

Pagbasa mula sa aklat ni propeta Malakias

Narito ang pahayag ng Makapangyarihang Panginoon,
“Ipadadala ko ang aking sugo
upang ihanda ang daraanan ko.
At ang Panginoon na inyong hinahanap
ay biglang darating sa kanyang templo.
Darating ang pinakahihintay ninyong sugo
at ipahahayag ang aking tipan.”

Ngunit sino ang makatatagal pagdating ng araw na iyon?
Sino ang makahaharap pag siya’y napakita na?
Siya’y parang apoy na nagpapadalisyay sa bakal
at parang matapang na sabon.
Darating siya para humatol
at dadalisayin niya ang mga saserdote,
tulad ng pagdalisyay sa pilak at ginto.
Sa gayon, magiging karapat-dapat
silang maghandog sa Panginoon,
at ang mga handog na dadalhin
ng mga taga-Juda at Jerusalem
ay magiging kalugud-lugod sa kanya, tulad ng dati.
Ngunit bago dumating ang nakahihindik
na araw ng Panginoon,
isusugo ko sa inyo si Propeta Elias.
Muling magkakalapit ang loob ng mga ama’t mga anak.
Kung hindi’y mapipilitan akong pumariyan
at wasakin ang inyong bayan.

Ang Salita ng Diyos.



SALMONG TUGUNAN

Salmo 24:4-5. 8-9. 10. 14

T. Itaas n'yo ang paningin,
kaligtasa'y dumarating.

**Ang kalooban mo'y ituro, O Diyos,
ituro mo sana sa aba mong lingkod;
ayon sa matuwid, ako ay turuan,
ituro mo, Poon, ang katotohanan.**

T. Itaas n'yo ang paningin,
kaligtasa'y dumarating.

**Mabuti ang Poon at makatarungan,
sa mga salari'y guro at patnubay;
sa mababang-loob siya yaong gabay,
at nagtuturo ng kanyang kalooban.**

T. Itaas n'yo ang paningin,
kaligtasa'y dumarating.

**Tapat ang pag-ibig, siya'ng umaakay
sa tumatalima sa utos at tipan.
Sa tumatalima, siya'y kaibigan,
at tagapagturo ng banal na tipan.**

T. Itaas n'yo ang paningin,
kaligtasa'y dumarating.



ALELUYA

T. Aleluya! Aleluya!
Hari't batong panulukang
Saligan ng Sambayanan,
halina't kami'y idangal.
T. Aleluya! Aleluya!

MABUTING BALITA

Lucas 1:57-66
Isinilang si Juan Bautista.

✠ Ang Mabuting Balita ng Panginoon ayon kay San Lucas

Dumating ang oras ng panganganak ni Elisabet,
at nagluwal siya ng isang sanggol na lalaki.
Nabalitaan ng kanyang mga kapitbahay
at mga kamag-anak na siya'y pinagpala ng Panginoon,
at nakigalak sila sa kanya.

Nang ikawalong araw,
dumalo sila sa pagtutuli ng sanggol.
Zacarias sana ang ipangangalan sa kanya
— gaya ng kanyang ama — ngunit sinabi ng kanyang ina,
“Hindi! Juan ang ipangangalan sa kanya.”
“Subalit wala isa man sa iyong mga kamag-anak
ang may ganyang pangalan,” wika nila.
Kaya't hinudyatan nila ang kanyang ama
at itinanong kung ano ang ibig niyang itawag sa sanggol.
Humingi siya ng masusulatan at sumulat ng ganito:
“Juan ang kanyang pangalan.”
At namangha silang lahat.
Pagdaka'y nakapagsalita siya at nagpuri sa Diyos.
Natakot ang lahat ng kanilang kapitbahay,
anupat naging usap-usapan sa buong kaburulan ng Judea
ang mga bagay na ito.



Pinakaisip-isip ito ng lahat ng nakaalam
at ang kanilang tanong:
“Magiging ano nga kaya ang batang ito?”
Sapagkat maliwanag na sumasakanya ang Panginoon.

Ang Mabuting Balita ng Panginoon.



PANALANGIN NG BAYAN

**Pinangalanang “Juan” ang anak ni Zacarias
na nangangahulugang “Mapagpala ang Diyos.”
Manalangin tayo na may matibay na pananalig
sa pagpapala ng Diyos:**

T. Panginoon, dinggin mo kami.

**Maipakita nawa ng mga pinuno ng Simbahan
at ng pamahalaan ang kagandahang-loob ng Diyos
sa pamamagitan ng kanilang tapat na paglilingkod sa bayan,
manalangin tayo sa Panginoon.**

T. Panginoon, dinggin mo kami.

**Pahalagahan nawa namin ang aming pagiging Kristiyano,
at isabuhay ang mga pangakong nakapaloob sa binyag
na aming tinanggap sa Simbahan,
manalangin tayo sa Panginoon.**

T. Panginoon, dinggin mo kami.

**Sa diwa ng Kamahal-mahalang puso ni Hesus
at Kalinislinisang puso ni Maria,
matuto nawang magdamayan ang mga pamayanan
upang kami’y lumago sa kapayapaan at kagalakan,
manalangin tayo sa Panginoon.**

T. Panginoon, dinggin mo kami.



**Matuto nawa kaming lumingap sa mga nakatatanda,
mga maysakit, mga nangungulila,
at mga biktima ng kalamidad,
manalangin tayo sa Panginoon.**

T. Panginoon, dinggin mo kami.

**Biyayaan nawa kami ng Panginoon ng isang masaganang ani,
iadya kami sa mga bagyo at kalamidad
alang-alang sa kapakanan ng aming pamilya at aming kapwa,
manalangin tayo sa Panginoon.**

T. Panginoon, dinggin mo kami.

**Panginoon Diyos,
tunghayan mo ang iyong bayan.
Magsikap nawa kaming sundin ang iyong kalooban.
Hinihiling namin ito sa pamamagitan
ni Hesukristong Anak mo kasama ng Espiritu Santo,
Diyos, ngayon at magpakailanman. Amen.**



PANALANGIN UKOL SA MGA ALAY

Ama naming Lumikha,
ang paghahaing ito na nagdudulot sa amin
ng ganap na pagsamba sa iyong kadakilaan
ay maging lubos nawang pakikipagkasundo namin sa iyo
upang maipagdiwang namin nang may dalisay na loob
ang pinagbuhatan ng aming Manunubos
na namamagitan kasama ng Espiritu Santo
magpasawalang hanggan.

PANALANGIN PAGKAPAKINABANG

Ama naming mapagmahal,
kaming pinapagsalo mo sa piging na banal
ay pagkalooban mo ng iyong kapayapaan
upang kami'y makapaghintay at makasalubong
nang may ilawang nagdiringas
para sa pagdating ng pinakamamahal mong Anak
na namamagitan kasama ng Espiritu Santo
magpasawalang hanggan.



IKA-24 NG DISYEMBRE

Ang pari o ang diyakono o sinumang angkop na tagapaglingkod ay makapagbibigay ng maikling paliwanag tungkol sa buod ng Misang ipagdiriwang.

Mga minamahal na kapatid,
habang naghihintay tayo sa kapaskuhan,
samahan natin si Zacarias
sa pagbati sa pagdating ng Panginoon.
Si Hesus ang “Araw ng Tagsibol”
na maghahatid ng liwanag sa sangkatauhang
nalalambungan ng kasamaan at kamatayan.
Ngayong nasulyapan na natin ang unang sinag ng umaga,
lubos tayong nasisiyahan
sapagkat abot-tanaw na ang kaligtasan natin.

Sa pagpapatuloy ng ating pagdiriwang,
hilingin natin na maitulad natin
ang ating mga kalooban ayon sa kalooban ng Diyos
kasama ni Maria na ating Ina.



PANALANGING PAMBUNGAD

Ama naming makapangyarihan,
niloob mong ang iyong Salita na ibinalita ng anghel
ay maging taong totoo sa sinapupunan ng Mahal na Birhen.
Ipagkaloob mong kaming sumasampalatayang
siya'y Ina ng Diyos
ay matulungan niyang dumalangin sa iyo
sa pamamagitan ni Hesukristo
kasama ng Espiritu Santo magpasawalang hanggan.



PAGPAPAHAYAG NG SALITA NG DIYOS

UNANG PAGBASA

2 Samuel 7:1-5. 8-12. 14. 16
Ang kaharian ni David ay mananatili
at hindi mawawaglit sa paningin ng Panginoon.

Pagbasa mula sa ikalawang aklat ni Samuel

Si David ay panatag nang nakatira sa kanyang bahay.
Sa tulong ng Panginoon,
hindi na siya ginambala ng kanyang mga kaaway.
Tinawag niya si Natan at sinabi,
“Nakikita mong nakatira ako sa tahanang sedro,
ngunit ang Kaban ng Tipan ay sa tolda lamang.”
Sumagot si Natan,
“Isagawa mo ang iyong iniisip,
sapagkat ang Panginoon ay sumasaiyo.”

Ngunit nang gabing iyo’y sinabi ng Panginoon kay Natan,
“Ganito ang sabihin mo kay David:
‘Ipagtatayo mo ba ako ng tahanan?
Inalis kita sa pagpapastol ng tupa
upang gawing pinuno ng bayang Israel.
Kasama mo ako saanmang dako
at lahat mong mga kaaway ay aking nilipol.
Gagawin kong dakila ang iyong pangalan
tulad ng mga dakilang tao sa daigdig.
Bibigyan ko ang Israel ng kanyang lupa
at doon ko patitirahin.
Wala nang gagambala sa kanila roon:
wala nang aalipin sa kanila tulad noong una,
buhat nang maglagay ako ng hukom nila.
Magiging payapa ka sapagkat wala nang gagambala sa iyo.

Bukod dito, akong Panginoon ay nagsasabi sa iyo:
Patatatagin ko ang iyong sambahayan.

Pagkamatay mo,

isa sa iyong mga anak ang ipapalit ko sa iyo.
Patatatagin ko ang kanyang kaharian.'

“Kikilanlin ko siyang anak

at ako nama'y magiging ama niya.

Magiging matatag ang iyong sambahayan,

ang iyong kaharia'y hindi mawawaglit sa aking paningin
at mananatili ang iyong trono.”

Ang Salita ng Diyos.



SALMONG TUGUNAN

Salmo 88:2-3. 4-5. 27. 29

T. Pag-ibig mong walang maliw
ay lagi kong sasambitin.

**Pag-ibig mo, Poon, na di nagmamaliw
ang sa tuwi-t'wina'y aking aawitin;
ang katapatan mo'y laging sasambitin,
yaong pag-ibig mo'y walang katapusan,
sintatag ng langit ang 'yong katapatan.**

T. Pag-ibig mong walang maliw
ay lagi kong sasambitin.

**Sabi mo, Poon, ikaw ay may tipan
na iyong ginawa kay David mong hirang
at ito ang iyong pangakong iniwan:
"Isa sa lahi mo'y laging maghahari,
ang kaharian mo ay mamamalagi."**

T. Pag-ibig mong walang maliw
ay lagi kong sasambitin.

**Gagawin ko siyang anak na panganay,
mataas na hari nitong daigdigan!
Laging maghahari ang isa n'yang angkan,
sintatag ng langit yaong kaharian.**

T. Pag-ibig mong walang maliw
ay lagi kong sasambitin.



ALELUYA

T. Aleluya! Aleluya!
Sinag ng buwang-liwayway
at araw ng kaligtasan
halina't kami'y tanglawan.
T. Aleluya! Aleluya!

MABUTING BALITA

Lucas 1:67-79

Magbubukang-liwayway sa atin ang araw ng kaligtasan.

✠ Ang Mabuting Balita ng Panginoon ayon kay San Lucas

Noong panahong iyon,
napuspos ng Espiritu Santo si Zacarias
na ama ni Juan at nagpahayag ng ganito:
“Purihin ang Panginoong Diyos ng Israel!
Sapagkat nilingap niya at pinalaya ang kanyang bayan,
At nagpadala siya sa atin
ng isang makapangyarihang Tagapagligtas,
Mula sa lipi ni David na kanyang lingkod.
Ipinangako niya sa pamamagitan
ng kanyang mga banal na propeta noong una,
na ililigtas niya tayo sa ating mga kaaway,
at sa kamay ng lahat ng napopoot sa atin.
Ipinangako rin niya na kahahabagan
ang ating mga magulang
at aalalahanin ang kanyang banal na tipan.
Iyan ang sumpang binitiwang niya
sa ating amang si Abraham,
na ililigtas tayo sa ating mga kaaway,
upang walang takot na makasamba sa kanya,
at maging banal at matuwid sa kanyang paningin,
habang tayo'y nabubuhay.



Ikaw naman, anak,
ay tatawaging propeta ng Kataas-taasan;
sapagkat mauuna ka sa Panginoon
upang ihanda ang kanyang mga daraanan,
at ituro sa kanyang bayan ang landas ng kaligtasan,
ang kapatawaran ng kanilang mga kasalanan.
Sapagkat lubhang mahabagin ang ating Diyos;
magbubukang-liwayway sa atin ang araw ng kaligtasan
upang magbigay-liwanag sa mga nasa kadiliman
at nasa lilim ng kamatayan,
at patnubayan tayo tungo sa daan ng kapayapaan.”

Ang Mabuting Balita ng Panginoon.



PANALANGIN NG BAYAN

**Pinasalamatan ni Zacarias ang Diyos
dahil sa pagiging tapat nito sa pangako.
Bunga ng pagtitiwala sa pagiging bukaspalad ng Diyos,
idulog natin ngayon sa kanya
ang ating mga pangangailangan:**

T. Panginoon, dinggin mo ang aming panalangin.

**Nawa ang Santo Papa Francisco
at mga kasama niyang lingkod sa Simbahan
ay patuloy na magpaalala sa Bayan ng Diyos
ng mga magandang pangako
ng kanyang paglingap at pagliligtas,
manalangin tayo sa Panginoon.**

T. Panginoon, dinggin mo ang aming panalangin.

**Nawa ang mga kawani ng pamahalaan
ay tumulad kay Zacarias na umasa sa Panginoon
para sa kanilang mga pangangailangan
sa halip na kumuha sa kaban ng bayan,
manalangin tayo sa Panginoon.**

T. Panginoon, dinggin mo kami.

**Nawa ang mga nakatatanda ay magbigay inspirasyon
habang isinasalaysay nila sa susunod na henerasyon
ang kanilang mga karanasan ng pagpapala
at pagliligtas ng Diyos,
manalangin tayo sa Panginoon.**

T. Panginoon, dinggin mo kami.



**Nawa ang mga kabataan ay mapuspos
ng ibayong sigla at pag-asa habang hinihintay ng lahat
ang muling pagdating ng Manunubos,
manalangin tayo sa Panginoon.**

T. Panginoon, dinggin mo kami.

**Nawa ingatan ng Diyos ang mga mahal natin sa buhay
na namayapa na, at maibsan nawa ang kalungkutan
at pananangis ng kanilang mga naulila,
manalangin tayo sa Panginoon.**

T. Panginoon, dinggin mo kami.

**Panginoong mahabagin at mapagmahal,
tulungan mo kaming maging malakas at matiyaga
sa gitna ng mga kahirapan.**

**Nawa ay huwag kaming mawalan ng pag-asa
sa katuparan ng iyong mga pangako.
Hinihiling naming ito sa pamamagitan
ni Kristong aming Panginoon. Amen.**



PANALANGIN UKOL SA MGA ALAY

Ama naming Lumikha,
ang mga alay naming nakahain sa iyong dambana
ay pabanalin nawa ng paglukob ng Banal na Espiritu
na pumuspos sa sinapupunan ng Mahal na Birheng Maria
upang magdalang-tao at magsilang sa iyong Anak
na siyang namamagitan magpasawalang hanggan.

PANALANGIN PAGKAPAKINABANG

Ama naming mapagmahal,
sa aming pagsasalo sa banal na hain
lagi nawa naming madama
ang iyong kagandahang-loob
upang kami'y magkamit ng kaligtasan
pakundangan sa pagkakatawang-tao ng iyong Anak
ngayong aming ginugunita ang kanyang Ina
sa pamamagitan din ni Hesukristo
kasama ng Espiritu Santo magpasawalang hanggan.





Archdiocesan Liturgical Commission
Manila